

古賦

五言古詩


七言古詩

元遺山集

一之四



16
2700
2



門八 16
2700
2

元遺山先生集卷第一

元遺山先生集卷第一

元張德輝頤齋類次

平定後學張穆廉友校梓

友校梓

古賦

秋望賦

步。裴。回。而。徒。倚。放。吾。目。乎。高。明。極。天。宇。之。空。曠。閱。歲。律。之。崢。嶸。於。時。積。雨。收。霖。景。氣。肅。清。秋。風。蕭。條。萬。籟。俱。鳴。菊。鮮。鮮。而。散。花。雁。杳。杳。而。遺。聲。下。木。葉。於。庭。舉。動。砧。杵。於。蕪。城。穹。林。早。寒。陰。厓。晝。冥。濃。澹。霏。拂。繞。白。紆。青。紛。叢。薄。之。相。依。浩。霜。露。之。已。盈。送。蒼。蒼。之。落。日。山。川。鬱。其。不。平。瞻。彼。轆。轤。西。走。漢。京。虎。踞。龍。蟠。王。伯。所。憑。雲。煙。慘。其。動。色。草。木。起。而。爲。兵。望。崧。少。之。霞。景。渺。浮。正。之。獨。征。汗。漫。之。不。可。與。期。竟。老。我。而。何。成。挹。清。風。於。箕。穎。高。巢。由。之。遺。名。悟。出。處。之。有。道。非。一。理。之。能。并。繫。

昭和十年
二月十三日
辨求

南山之石田。維景略之所耕。老螭盤盤。空谷淪精。非雲雷之一舉。將草木之偕零。太行截天。大河東傾。邈神州於西北。恍風景於新亭。念世故之方殷。心寂寞而潛驚。激商聲於寥廓。慨涕泗之緣纓。吁咄哉事變於已窮。氣生乎所激。豫州之士。復於慷慨擊楫之誓。西域之侯。起於窮悴傭書之筆。諒生世之有爲。寧白首而坐食。且夫飛鳥而戀故鄉。嫠婦而憂公室。豈有夷墳墓而翦桑梓。視若越肥而秦瘠。天人不可以偏廢。日月不可以坐失。然則時之所感也。非無候蟲之悲。至於整六翮而睨層霄。亦庶幾乎鷺禽之一擊。

蒲桃酒賦 并序

劉鄧州光甫爲予言吾安邑多蒲桃。而人不知有釀酒法。少日嘗與故人許仲祥摘其實。并米炊之。釀雖成。而古人所謂

甘而不飴。冷而不寒者。固已失之矣。貞祐中。鄰里一民家避寇自山中歸。見竹器所貯蒲桃。在空盎上者。枝蒂已乾。而汁流盎中。薰然有酒氣。飲之良酒也。蓋久而腐敗。自然成酒耳。不傳之祕。一朝而發之。文士多有所述。今以屬子。子寧有意乎。予曰。世無此酒久矣。予亦嘗見。還自西域者云。大石人絞蒲桃漿。封而埋之。未幾成酒。愈久者愈佳。有藏至千斛者。其說正與此合。物無大小。顯晦自有時。決非偶然者。夫得之數百年之後。而證數萬里之遠。是可賦也。於是乎賦之。其辭曰。西域開。漢節回。得蒲桃之奇種。與天馬兮俱來。枝蔓千年。鬱其無涯。斂清秋以春煦。發至美乎胚胎。意天以美釀而飽子。出遺法於湮埋。索罔象之玄珠。薦清明於玉杯。露初零而未結。雲已薄而成裁。挹幽氣之薰然。釋煩悃於中懷。覺松津之

孤峭。羞桂醕之塵埃。我觀酒經。必麴蘖之中媒。水泉資香潔之助。秣稻取精良之材。效眾技之畢前。敢一物之不借。艱難而出美好。徒耽毒之貽哀。繫工倕之物化。與梓慶之心齋。既以天而合天。故無桎乎靈臺。吾然後知珪璋玉毀。青黃木災。音衰而鼓鐘。味薄而鹽梅。惟揮殘天下之聖法。可以復嬰兒之未孩。安得純白之士。而與之同此味哉。

新齋賦 并序

予既罷內鄉。出居縣東南白鹿原。結茅菊水之上。聚書而讀之。其久也。優柔厭飫。若有所得。以爲平生未嘗學。而學於是乎始。乃名所居爲新齋。且爲賦以自警。其辭曰。新之爲說也。在金曰從革。在木曰從斤。正陵爲山。而惡乎畫。履霜堅冰。而致於馴。猶之於人。則齊魯有一再之漸。狂聖由

念否之分。唯夫守一而不變者。不足以語化。化之爲神。拊陳迹以自觀。悼吾事之良勤。失壯歲於俯仰。竟四十而無聞。聖謨洋洋。善誨循循。出處語默之所依。性命道德之所存。有三年之至穀。有一日之歸仁。動可以周萬物。而濟天下。靜可以崇高節。而抗浮雲。曾出此之不知。乃角逐乎空文。偃北轅以適楚。將疇問而知津。揜虛名以自夸。適以增頑而益闇。我卜我居於浙之濱。方處陰以休影。思沐德而澡身。蓋嘗論之。生而知困。而學固等級之不躡。憤則啟悻。則發亦愚智之所均。齋戒沐浴。惡人可以祀上帝。潔己以進童子。可以遊聖門。顧年歲之未暮。豈終老乎凡民。已焉哉。孰糟粕之弗醇。孰土苴之弗真。孰昧爽之弗旦。孰悴槁之弗春。人安知溫故知新。與夫去故之新。他日不爲日新。又新日日新之新乎。

行齋賦 并序

戊子冬十月長壽新居成仲經張君從予卜鄰得王氏之敗
屋焉環堵蕭然不蔽風日君爲之補罅漏治蕪穢蓋十日而
後可居華門圭竇故事畢舉取君子素其位而行之義名曰
行齋而乞文於予予以爲士之貧至於君極矣無祿以爲養
無田以爲食無僮僕爲之負販無子弟爲之奔走無好事者
爲之謀緩急而助薄少率貲無旬日計泰然以閉戶讀書爲
業不以爲失次而以爲當然不以爲怨不以爲憂而又且以
爲樂也然則不謂之無媿其名也而可乎迺爲賦云
賦分在人如物有常反鶴與鳧無益短長力有可求勝天不
祥福不盈睫一敗莫償莫難養心操存舍心出入無時兮莫
知其鄉飽飢有時而激怒兮殆豢虎之貽殃我思古人動靜

有方靜以養虛剛以作強辱以處汙愚以退藏屹中立而不
倚潮橫潰而獨障直鉤磻溪之魚秃節單于之羊有漆身以
爲厲自被髮而爲狂仕汙世而執翽徇殊俗而解裳太阿存
兼善之達緼袍有不求之臧惟夫長劔大冠以揖讓人主之
前者若固有故木食澗飲雖至於勞筋骨而餓體膚者爲無
傷古有之居不隱者志不廣身不抑者志不揚士固有遯世
而不復見然愈揜而愈彰南山蒼蒼北風雨霜有蘭不彫俟
春而芳偉哉造物又將發吾子之幽光邪

太阿卽阿
衡見文選

五言古詩

箕山

幽林轉陰厓鳥道人迹絕許君棲隱地惟有太古雪人間黃
屋貴物外祇自潔尚厭一瓢喧重負寧所屑降衷均義稟泪

利念智決得隴又望蜀。有齊安用辭。干戈幾蠻觸。宇宙日流
血。魯連蹈東海。夷叔采薇蕨。至今陽城山。衡華兩玉瑀。古人
不可作。百念肺肝熱。浩歌北風前。悠悠送孤月。

緱山置酒

同內翰馮丈叔獻雷兄
希顏賦詩分韻得賓字

靈宮肅清曉。細柏含古春。人言王子喬。鶴馭此上賓。白雲山
蒼蒼。平田木欣欣。登高覽元化。浩蕩融心神。西望洛陽城。大
路通平津。行人細如蟻。擾擾爭紅塵。蓬萊風濤深。鬢毛日夜
新。殷勤一杯酒。媿爾雲間人。

同希顏再登箕山

千年箕山祠。蘿徑深以悄。桂樹不復見。禿籜餘秋篠。盤盤盡
絕頂。石冢平木杪。長風萬里來。筋骸覺輕矯。側身望巖竇。解
衣憩林表。是時夏春交。野色亂青縹。川光乍明滅。地脈互縈

繞。岡巒蟻垤出。井邑蜂衙擾。紅塵洛陽昏。白雲太行曉。元功
信冥漠。一覽疑可了。悟彼東山人。胸中魯宜小。

光武臺

東南地上遊。荆楚兵四衝。游子十月來。登高送長鴻。當年赤
帝孫。提劍起蒿蓬。一顧澠水斷。再顧新都空。雷霆萬萬古。青
天看飛龍。歸然此遺臺。落日荒煙重。誰見經綸初。指揮走羣
雄。白水日夜東。石麟幾秋風。空餘廣武歎。無復雲臺功。

潁亭留別

同李治仁卿張肅子敬王
元亮子正分韻得畫字

故人重分攜。臨流駐歸駕。乾坤展清眺。萬景若相借。北風三
日雪。太素秉元化。九山鬱崢嶸。了不受陵跨。寒波淡淡起。白
鳥悠悠下。懷歸人自急。物態本閒暇。壺觴負吟嘯。塵土足悲
吟。回首亭中人。平林澹如畫。

灑亭

春物已清美。客懷自幽獨。危亭一徘徊。翛然若新沐。宿雲淡
川野。元氣浮草木。微茫盡楚尾。平遠疑杜曲。生平遠游賦。吟
諷心自足。竭來著世網。抑抑就邊幅。人生要適情。無榮復何
辱。乾坤入望眼。容我謝羈束。一笑白鷗前。春波動新綠。

出京

史院得告歸
嵩山侍下

從宦非所堪。長告欣得請。驅馬出國門。白日觸隆景。半生無
根著。飄轉如斷梗。一昨隨牒來。六月阻歸省。城居苦湫隘。羣
動日蛙黽。慚媿山中人。團茅遂幽屏。塵泥免相浼。夢寐見清
潁。矯首孤飛雲。西南路何永。

元魯縣琴臺

荒城草木合。破屋風雨侵。千年一琴臺。睠焉涕盈襟。遺愛食

縣社公寧不堪任。此臺卽甘棠。忍使無餘陰。旁舍高以華。大
豪日捐金。蒼雲玄武暮。鬼物憑陰岑。尙德抑玄虛。墜典誰當
尋。我興薦寒泉。百拜公來臨。公來不能知。落日下飢禽。懷哉
空山裏。鶴飛猿與吟。當年于蒦歌。補袞一何深。承平示得意。
獨能正哇淫。君相此一時。又復悟良箴。諛臣坐廢黜。益亦起
幽沈。蒲輪竟頽轂。香草空淡林。寂寞授書室。孤甥舉遺衾。生
平諒已然。薄俗矧來今。千山爲公臺。萬籟爲公琴。夔曠不竝
世。月露爲知音。人間蹄涔耳。已矣非公心。
元道州文編以元
魯山爲元魯縣又
臺今爲玄武
祠故及之

灑水

聞郟城張伯
玉計音作

灑水復灑水。東望雁行沒。殷勤一杯酒。遙酌灑亭月。永懷紫
髯郎。冠佩見突兀。巖巖石青峙。鬱鬱松秀發。裴回功名會。脫

落豪俠窟中。州有士論指與雷。李屈挂弓須扶桑。洗劍必溟
渤。皇天靳美器。一世惜英物。神交付冥漠。生氣凜毛髮。古來
天下馬。萬里入超忽。良樂不竝世。燕市空駿骨。狂歌叫秋雲。
北風撼林樾。

雜著五首

集陶句

稟氣寡所諧。衣食固無端。所業在農桑。甘以辭華軒。田家豈
不苦。歲功聊可觀。帶月荷鋤歸。裴回上隴間。曖曖遠人邨。紛
紛飛鳥還。養真衡茅下。庶無異患干。遙謝荷蓀翁。躬耕非所
嘆。
守拙歸田園。淹留自無成。長吟掩柴門。遂與塵事冥。素月出
東嶺。夜景湛虛明。揮杯勸孤影。杯盡壺自傾。遙遙望白雲。千
載有淡情。

榮叟老帶索。原生納決履。邈哉此前脩。久而道彌著。人生少
至百。每每多憂慮。量力守故轍。餘榮何足顧。棲遲固多娛。幾
人得其趣。

桃李羅堂前。霜露榮悴之。咄咄俗中惡。人道每如茲。冬嶺秀
孤松。卓然見高枝。提壺撫寒柯。懷此貞秀姿。願留就君住。終
身與世辭。

世短意恒多。時駛不可追。感彼柏下人。泣然沾我衣。運生會
歸盡。彼此更共之。理也可奈何。一觴聊可揮。酒中有淡味。情
隨萬化遺。西南望昆墟。靈人侍丹池。我無騰化術。帝鄉不可
期。且極今朝樂。千載非所知。

古意二首

七歲入小學。十五學時文。二十學業成。隨計入咸秦。秦中多

貴游幾與書生親。年年抱關吏。空笑西來頻。在昔學語初。父兄已卜鄰。跛鼈不量力。強欲緣青雲。四十有牧豕。五十有負薪。寂寥抱玉獻。賤薄倡優陳。青衫亦區區。何時畫麒麟。遇合僅一二。飢寒幾何人。誰留章甫冠。萬古徒悲辛。

桃李弄嬌嬈。梨花澹丰容。盈盈兩無語。鱗鱗爭春風。春風何許來。草木誰青紅。天公亦老矣。何意夸兒童。昨朝花正開。今朝花已空。川流不冝駐。併與繁華東。榎楠千歲姿。骯髒空谷中。陽和不擇地。亦復難爲功。本無兒女心。安用尤天公。

穎谷封人廟

洩洩穎谷雲。融融穎川水。封君去我久。水雲自清美。人言君善諫。微意得鄭子。特於悔悟時。一語發天理。大孝動天地。土苴及頑鄙。反身而未誠。善諫且敗矣。如何千載下。乃與茅焦

比。我行穎川道。永念負甘旨。願作頰尾鮓。因之日千里。

贈荅劉御史雲卿四首

舊聞劉君公。學經發源深。驂騑萬里氣。聖塗已駸駸。大梁語三日。副我夙所欽。濂溪無北流。此道日西沈。百年牛山木。不復秀穹林。南風雖寥寥。聞絃猶賞音。獨憐夸毘子。一我無古今。共學君所貪。適道我豈任。相酬無別物。徒有好賢心。阿京吾所畏。蚤生號能文。初無王家癖。聲光自流聞。此行不虛來。得接大小君。信知珠玉淵。足當羔雁羣。君家有箕裘。聖學待冊勳。但使本根在。枝葉復何云。殷勤五色筆。未用摧干

軍。學道有通蔽。今人乃其尤。溫柔與敦厚。埽滅不復留。高塞當父師。排擊劇寇讎。真是未可必。自私有足羞。古人相異同。寧

復操戈矛。春風入萬物。枯枿將和柔。克己未有加。歸仁亦何由。先儒骨已腐。百罵不汝酬。胡爲文字間。刮垢搜癩疣。吾道非申韓。哀哉涉其流。大儒不知道。此論信以不。我觀唐以還。斯文有伊周。開雲揭日月。不獨程張儔。聖塗同一歸。論功果誰優。戶牖徒自開。膠漆本易投。九原如可作。吾欲起韓歐。老鶴何許來。澹與孤雲同。相值太虛室。悠然復西東。聖學要淡談。惜君別匆匆。何時沂水上。同詠舞雩風。

送欽叔內翰并寄劉達卿郎中白文學編修五首

忽忽歲云暮。烈烈風霜威。舉頭望長安。游子從此歸。我有平生懷。愛君如連枝。半年姜肱被。所樂良不貲。尙恨人事異。離合無定時。送君酒一杯。侑以彈鋏辭。上言行路難。下言長相思。

六月渡盟津。十月行汜水。風濤脫沈舟。冰雪危墮指。孝子在中野。永念負甘旨。家貧親已老。形瘵心欲死。古稱季路孝。負米曾百里。願作鯉與魴。寧當怨鰥尾。君歸不可緩。獻壽迫歲始。遙知慈母心。已爲烏鵲喜。

一年不製衣。春服犯霜風。一日僅兩食。腸胃不得充。生平萬里氣。頓入低回中。田夫怒攘臂。縮首甘旨聾。老兵賜顏色。歡喜無所容。求索厭朋友。勞苦慚僕僮。無聊復無聊。又復招災凶。我有一樽酒。澆君塊磊胸。君年始三十。白髮成一翁。願以寸心微。受此百慮攻。君窮復何辭。不見閑閑公。文章二百年。不救四壁空。

君性我所諳。我心君所知。凡我之所短。君亦時有之。謀事恨太銳。臨斷恨太遲。持論恨太高。徇俗恨太卑。人道自近始。貧

富理不齊君自不得飽。欲療何人饑。乞醯乞諸鄰。聖哲有明
 識。被髮救鄉人。智者所不為。且如與人交。交有非所宜。白黑
 不復擇。豁豁傾心脾。泛愛豈不可。後悔終自貽。又如與人言。
 寧復無失辭。刺口論成敗。白眼談歌詩。世故穀黃閒。能不發
 其機。聞君作損齋。似覺豪華非。懲忿與窒慾。百年有良規。與
 子各努力。歲晚以為期。

古人遙相望。每恨不同時。同時得古人。歡樂良在茲。君歸豈
 不佳。交游滿京師。門前車馬來。笑言慰所思。細話洛陽事。高
 詠嵩山詩。宮壺發新籥。宮梅耿幽姿。故應劉與白。亦復念微
 之。

飲酒五首 襄城作

西郊一畝宅。閉門秋草深。牀頭有新釀。意愜成孤斟。舉杯謝

明月蓬華甯相臨。願將萬古色。照我萬古心。
 去古日已遠。百偽無一真。獨餘醉鄉志。中有羲皇淳。聖教難
 為功。乃見酒力神。誰能釀滄海。盡醉區中民。
 利端始萌芽。忽復成禍根。名虛買實禍。將相安足論。驅驢上
 邯鄲。逐免出東門。離官寸亦樂。里社有拙言。離官寸亦樂。晉俚諺云然。
 萬事有定分。聖智不能移。而於定分中。亦有不測機。人生桐
 葉露。見日忽已晞。唯當飲美酒。儻來非所期。
 此飲又復醉。此醉更酣適。徘徊雲間月。相對澹以默。三更風
 露下。巾袖警微溼。浩歌天壤間。今夕知何夕。
 後飲酒五首 陽翟作
 少日不能觴。少許便有餘。比得酒中趣。日與杯杓俱。一日不
 自澆。肝肺如欲枯。當其得意時。萬物寄一壺。作病知奈何。妾

婦良區區。但媿生理廢。饑寒到妻孥。吾貧蓋有命。此酒不可無。

金丹換凡骨。誕幻苦無實。如何杯杓閒。乃有此樂國。天生至神物。與世作酣適。豈曰無妙理。澁漾莫容詰。康衢吾自樂。何者為帝力。大笑白與劉。區區頌功德。

客從崧少來。貽我招隱詩。為言學仙好。人閒竟何為。一笑顧客田。神仙非所期。山中如有酒。吾與爾同歸。

酒中有勝地。名流所同歸。人若不解飲。俗病從何醫。此語誰所云。吾友日紫芝。紫芝雖吾友。痛飲真吾師。一飲三百杯。談笑成歌詩。九原不可作。想見當年時。

飲人不飲酒。正自可飲泉。飲酒不飲人。屠沽從擊鮮。酒如以人廢。美祿何負焉。我愛靖節翁。於酒得其天。龐通何物人。亦

復為陶然。兼忘物與我。更覺此翁賢。

德禪師清涼草堂

舊隱伊陸巷。把茅入冥息。新居蘭若峰。老屋補漏坼。鐘魚有勝氣。餅錫無滯迹。回頭仙人隊。談笑初未隔。結草幾成壤。逆旅誰主客。道人那計許。一笑山月白。多生負詩債。秋物苦催索。遙知得新句。崧少為動色。

上人舊隱伊陽伊陽有伊陸巷仙人隊者。女凡山諸峯名。

少林

雲林入清溪。禪房坐蕭爽。澗泉潔餘習。高鳥喚長往。我無玄豹姿。漫有紫霞想。回首山中雲。靈芝日應長。

劉曲龍潭

層冰積浩蕩。陵谷互吞吐。窈窕轉幽壑。突兀開淨宇。回頭山水縣。亦復墮塵土。孤雲鐵梁北。宇宙一仰俯。風景初不殊。川

塗忽脩阻寒潭海眼淨黧黑自太古蟄龍何年臥萬國待霖
雨誰能裂蒼厓雷風看掀舉山中人歲旱則轉大石入潭以駭龍瞬息致雨故云

麥歎

借地乞麥種微倖今年秋乞種尚云可無丁復無牛田主好
事人百色副所求盼盼三百斛寬我饑寒憂我夢溱南川平
雲綠油油起來望河漢旱火連東州四月草不青吾種良漫
投田閒一太息此歲何時周向見田父言此田本良疇三歲
廢不治種則當倍收何如落吾手羊年變雞猴身自是早母
咄咄將誰尤人滿天地閒天豈獨我饑正以賦分薄所向困
拙謀不稼且不穡取禾亦何由辦作高敬通惡雨將漂流吾
貧有濫觴賢達未始羞單衣適至骭一劔又蒯緱焉知寄食
餓不取丞相侯作詩以自廣時用商聲韻

北邙

驅馬北邙原踟躕重踟躕千年富貴人零落此山隅萬冢不
復識榛莽餘龜趺賢愚同一盡感極增悲獻粵人惟物靈生
也與道俱一爲物所眩遂爾迷厥初蛻骨幾山丘百年不須
與歸盡固其理交喪亦已愚陳迹有足悲柰此萬化塗焉知
原上冢不有當年吾

龍門雜詩二首

石樓繞清伊塵土天所限人言無僧久草滿不復剗灘聲激
悲壯山意出高蹇當年香山老掛冠遂忘返高情留詩軸清
話入禪版誰言海山去蕭散仍在眼溪寒不可涉倚杖西林
晚

不見木庵師胸中滿泥塵西窗一握手大笑傾冠巾青山有

佳招一游負因循老筇動高興萬景森前陳乾元先有期清
伊亦知津細看潛溪樹高臥香山雲學詩二十年鈍筆死不
神乞靈白少傅佳句儻能新遙遙洛陽城梅花千樹春山中
有心事寄謝城中人

豐山懷古

豐山一何高古屋蒼煙重開門望吳楚鳥去天無窮迎山橫
巨鼇白水亘長虹川原鬱佳氣自古南都雄炎精昔季興臥
龍起隆中落落出奇策言言揭孤忠時事有可論生晚恨不
逢漢賊不兩立大義皎日同吳人操等耳忍與分河潼奪操
而與權何以示至公一民漢遺黎尺地漢故封守民及守土
天地與相終不能禦寇讎顧以寇自攻既異鴻溝初又非列
國從一券損半產二祖寧汝容端本一已失孤唱誰當從至

今有遺恨廟柏號陰風舊聞清冷淵天籟如撞鐘山經野人
語誕幻欺孩童開元有亂階鹿飲溫泉宮黃猿何爲者乃爾
能嘯兇乾坤之大音久鬱理當通清霜旦夕落佇爾驚羣聳
孔明自謂漢室季興清冷淵黃猿出見廟碑述開元事

乙酉六月十一日雨

一旱近兩月河洛東連淮驕陽佐大火南風捲黃埃草樹青
欲乾四望令人哀時時怪事發雨雹如李梅我夢天河翻崩
騰走雲雷今日復何日駛雨東南來元氣淋漓中焦卷意已
回良苗與新穎鬱鬱無邊涯書生如老農苦樂與之偕閭閻
聞吉語一笑心顏開酉年酒如漿乾溘安能裁唯當作高廩
多具尊與囂家人笑問我君田安在哉駛雨與使同音見魏志

示姪孫伯安

伯安入小學穎悟非凡兒屬句有夙性說字驚老師見汝挾
書歸憶我青衿時青衿昨日耳齒髮忽如茲讀書誤人多闕
疏亦天資元無倚天劍可斷扶桑枝倚梯望青冥愚者知笑
之壯事已無取老謀欲何施幸此掌中孫未染如素絲就令
好紙筆門戶誰當支我有商餘田汝壯可耘耔便當學種樹
未用城南詩伯安方讀韓集符讀書城南

種松

百錢買松羔植之我東牆汲井浣塵土插籬護牛羊一日三
摩掌愛比添丁郎昨宵入我夢忽然變昂藏昂藏上雲雨慘
澹含風霜起來月中看細鬣錯鍼芒惘然一太息何年起明
堂鄰叟向我言種木本易長不見河畔柳顧盼百尺強君自
作遠計今日何所望

虞鄉麻長官成趣園二首

鑿池水交流築屋山四繞衡門在人境三徑深以悄中庭八
九樹晨坐聽百鳥人生信多慮長寢容未了虛舟有天游我
定物自擾豈不與世竝自是萬物表達觀無不可言外當意
曉

蹉跎匡山游爛漫彭澤酒慨然千載上懷我平生友夫君負
奇節劍氣鬱星斗爲吏非所堪徑去如避走王官唐以還寂
寞蓋已久柴車君來隱清風動林藪至今溪上詩往往在人
口淵明不可作此士寧復有

雜詩四首

相士如相馬滅沒深天機區區銅馬法徒識牝與驢人言當
塗公惡人知其微如何許劭語受之不復疑知人固不易人

亦未易知。媿妍在水鏡。鉛粉徒自欺。孰爲仁義人。未假已不歸。伯樂不可作。思與曹瞞期。

世事如大弩。人若材官然。乘勢易發機。非是勞控弦。又如大水中。置彼萬斛船。雖有帆與檣。亦須風動天。不見周公瑾。弱齡已飛鸞。不見師尚父。鷹揚在華顛。彼非生而材。此豈晚乃賢。鎡基喻智慧。要必有待焉。嘆息狂馳子。嘗爲愚者憐。

崑山有璞玉。外質而內美。惟其不自衒。故與頑石齒。和也速於售。再獻甘滅趾。在玉庸何傷。惜君兩足耳。

堂堂明堂柱。根節幾歲寒。使與蒲柳同。扶廈良勝難。我衣敝縕袍。我飯苜蓿盤。天公方試我。劔缺勿妄彈。

采杞

仙苗不擇地。榛莽散秋實。微霜綠未隕。濃露紅欲滴。方書尙

服餌。僮僕課采拾。花葉久已厭。功實從此得。苦茶薦奇味。凡醞化靈液。人傳東坡事。世驗西河術。誰口亦自佳。輕骨況可必。維物多似是。致用相萬一。向非觀玉篇。誰爲分杞棘。

宿菊潭

田父立馬前來。赴長官斯。父老且勿往。問汝我所疑。民事古所難。令才又非宜。到官已三月。惠利無豪釐。汝鄉之單貧。寧爲豪右欺。聚訟幾何人。健鬪復是誰。官人一耳目。百里安能知。東州長官清。白晝下邨稀。我雖禁吏出。將無夜叩扉。教汝子若孫。努力逃寒饑。軍租星火急。期會切莫違。期會不可違。鞭扑傷汝肌。傷肌尙云可。天闕令人悲。

觀浙江漲

一旱千里赤。一雨垣屋敗。浙故以江名。暴與眾壑會。初驚沙

石捲稍覺川谷隘。雷風入先驅。大塊供一噫。千帆鼓前浪。萬馬接後派。崩崖不暇顧。拔木無留礙。憑陵如藉勢。洞汭各有態。平分乍舒徐。怒觸忽碎壞。雲蒸楚樹杪。雪映商嶺背。髣髴千丈潮。恍與海門對。欬飛鬪蛟鱷。燃犀出鱗介。陽侯富陰族。萬首露光怪。翠蕤澹偃蹇。鉦鼓亂碇礚。永懷疏鑿力。重歎神禹大。乾坤海爲壑。未礙變橫潰。納汗非無處。流惡聊自快。投詩與龍盟。滌蕩煩一拜。

時拜大赦五日矣

鶴雀崖北龍潭

層崖闕頑陰。水木淡以阻。湍聲半空落。洶洶如怒虎。風生木葉脫。魄動不敢語。何年渾沌竅。靈物此棲處。初從一綫溜。開鑿到神禹。雲雨鼓飛浪。噴薄齊萬弩。藏珠驪龍領。百斛使一吐。油油入無底。細散不濡縷。歸藏海有穴。汎濫愁下土。南峯

天一柱。萬古鎮幽府。江山有奇揆。落景迫行旅。多勉茹芝人。終年看飛雨。

五松平

竹港晨露白。石門秋氣寒。湍流落澗壑。細路淡茅菅。江平白石出。竟日浴清灣。四顧不見人。山鳥時聞關。蒼厓入地底。煙靄青漫漫。力盡不能過。卻坐空長嘆。青天白雲閒。可望不可攀。虛名竟何得。行路乃爾難。

阻雨張主簿草堂

溼暑雲氣鬱。漫淫成積雨。南風竊陰機。萬籟困掀舉。飛濤限江岸。懸流迫茅宇。塊坐百慮滋。歸興生鳥羽。兒童十日約。竹馬候門廡。曾是百里程。川塗忽退阻。少游去我久。念子平生語。款段劣可乘。贏餘果何取。河汾敞廬在。坐滯西南楚。世事

遺山先生集 卷一
不可期客心徒自苦

贈荅楊煥然

詩心又已久雅道不復陳
人人握和璧燕石誰當分
關中楊夫子高誼世所聞
十年玄尚白藜藿甘長貧
有來河水篇四海付斯文
斯文有定在桓生知子雲
古來知已難萬里猶比鄰
千人國中和要非心所親
東楚西南秦望君勞我神
相逢不得語別去徒殷勤
白雲不可贈相思秋復春

送詩人李正甫

陽和入枯株藹藹含芳津
山頭太古石不與萬物春
朝從木客游暮將山鬼鄰
紫芝僅盈芻幽蘭不充紉
青雲入長吁肝膽空輪囷
我嘗讀君詩天趣觸眼新
秦游得豪宕晉產餘眞淳
怒虎不受唾駭鹿未易馴
安坐誰不如半生走逡巡
蒼蒼

不可問藐藐誰當親
青山碾爲塵白日無閒人
空歌東野曲不救西州貧

遺山先生集卷第一

遺山先生集卷第二

元張德輝頤齋類次 平定後學張穆廉友校梓

五言古詩

萬化如大路

萬化如大路。物我適相遭。往來限鄰屋。夢寐阻同袍。斷金幾
 何人。年運劇銷膏。相歡顧不足。爾戈奚暇操。古來太山名。達
 觀等秋毫。蠻觸徒能國。蜾蠃竟誰豪。曠蕩覽八紘。美惡自為
 曹。造物無巧擇。大塊有并包。暴公今在亾。轉燐起蓬蒿。孤心
 既悄悄。眾口益嗷嗷。同塵寧當悔。枉已乃為勞。鹿門有高躅。
 世網儻能逃。

曉發石門渡湍水道中

水經湍音專

疏星澹秋明。陰霞絢朝映。積雨成坐愁。晨光動幽興。石門歸

馭引湍浦漁刀竝。曠蕩萬景新。歸藏四山靜。平湖風漪綠。遠岸秋沙淨。洋洋游鯨逝。汎汎輕鷗泳。隱顯乖夙心。感寓見眞性。倦遊時自悼。違已將安竟。憂端從中來。茫茫發孤詠。

放言

韓非死孤憤。虞卿著窮愁。長沙一湘纍。郊島兩詩囚。人生定能幾。肺肝日相讎。井蛙奚足論。禪蝨良足羞。正有一朝樂。不償百年憂。古來帝王師。或從赤松遊。大笑人間世。起滅眞浮漚。曾是萬戶封。不博一掉頭。有來且當避。未至吾何求。悠悠復悠悠。大川日東流。紅顏不暇惜。素髮忽已稠。我欲升嵩高。揮杯勸浮丘。因之兩黃鵠。浩蕩觀齊州。

李道人崧陽歸隱圖

北山范寬筆。老屨無妍姿。南山小平遠。澹若韋郎詩。崧陽古

仙。卽佳處我所知。長林連玉華。細路入清微。連延百餘家。柴門水之澹。桑麻蔽朝日。雞犬通垣籬。媿我出山來。京塵滿山衣。春風四十日。夢與孤雲飛。可笑李山人。嗜好世所稀。逢人覓詩句。不恤怒與譏。道人本無事。何苦塵中爲。京師不易居。我癡君更癡。山中酒應熟。幾日是歸期。

黃公廟

羈客無恒居。六月走長路。清風黃公祠。地古欣所遇。劔飛素靈哭。龍躍雲雨赴。堂堂文成君。談笑取帝傅。功名要有命。陰相果何豫。誰謂圯上人。異事驚竹素。河清不可俟。筋力疲世故。袖間一編書。塵埃歎遲暮。

學東坡移居八首

廢地三畝餘。十年長蒿萊。瓦礫雜糞壤。白骨溪蒼苔。孤客無

所投卽此營茅齋墜斷豈不苦寢處亦可懷辱身賤者事寧
當惜筋骸伐木荒林中運甓古城隈辛勤八十日吾事乃得
諧買宅必萬錢一錢不天來今晨見此屋一笑心顏開
誰謂我屋寬寢處無復餘誰謂我屋小十口得安居南榮坐
諸郎課誦所依於西除著僮僕休休得自如老我於其閒兀
兀窮朝晡起立足欠伸偃臥可展舒窗明火焙煖似欲忘囚
拘屋前有隙地客舍不可無花欄及菜圃次第當耘鋤東野
載家具家具少於車我貧不全貧尙有百本書

故書堆滿牀故物貯滿箱渾渾商寶鬲纍纍漢銅章杖飾昭
敬恭嚴卯訶痺剛雷文繞杖節獸面出佩璜私印刻王尊玉
斗蛟龍翔逸少留半紙魚網非磬黃亦有曇首帖不辦作雁
行雪景睿思物宣政舊所藏晉公古漁父浩歌濯滄浪因觀

宮騎圖臥駝識提囊谿石含餘潤奚墨凝幽香南榮挂風響
雲裾珮鏘鏘鏡背先秦書八字環中央讀之三嘆息此日何
時光

壬辰困重圍金粟論升勺明年出青城瞑目就束縛豪釐脫
鬼手攘臂留空橐聊城千里外狼狽何所託諸公頗相念餘
粒分鳧鶴得損不相償抔土填巨壑一冬不製衣繒纈如紙
薄一日僅兩食強半雜藜藿不羞蓬蓽行粗識瓢飲樂敵貧
如敵寇自信頗亦慙兒啼飯籬空堅陣爲屢卻滄溟浮一葉
渺不見止泊五窮果何神爲戲乃爾虐

舊隱嵩山陽筍蕨豐餽餉新齋浙江曲山水窮放浪乾坤兩
茅舍氣壓華屋上一從陵谷變歸顧無復望樵漁憶還往風
土夢閒曠恍如悟前身姓改心不忘去年住佛屋盡室寄尋

丈今年僦民居。臥榻礙盆盎。靜言尋禍本。正坐一出矣。青山不能隱。俛首入羈鞅。巢傾卵隨覆。身在顏亦強。空悲龍髯絕。永負魚腹葬。置錐良有餘。終身志懲創。一作悲愴國史經喪亂。天幸有所歸。但恨後十年。時事無人知。廢興屬之天。事豈盡乖違。傳聞入讎敵。祇以興罵譏。老臣與存亡。高賢死兵飢。身死名亦滅。義士爲傷悲。哀哀淮西城。萬夫甘伏尸。田橫巨擘耳。猶爲談者資。我作南冠錄。一語不敢私。稗官雜家流。國風賤婦詩。成書有作者。起本良在茲。朝我何所營。暮我何所思。胸中有茹噎。欲得使吐之。溼薪煙滿眼。破鏡冰生髭。造物留此筆。吾貧復何辭。

東坡謫黃州。符藥行江湖。荒田拾瓦礫。賤役分僮奴。我讀移居篇。感極爲悲歎。九原如可作。從公把犁鋤。我貧公亦貧。賦分無賢愚。論人雖甚媿。詩亦豈不如。

此州多寓士。論年悉肩隨。風波同一舟。奚必骨肉爲。倪家蓮華白。每釀必見貽。季昌妙琴事。足以相娛嬉。郭侯家多書。篇帙得徧窺。趙子篤於學。閒以問所疑。王生舊鄰舍。窮達心不移。千里訪存歿。十口分寒飢。獨有仲通甫。天馬不可羈。直以論詩文。稍稍窺藩籬。永懷王與李。朔漠行當歸。書來聞吉語。報我脫繫維。慚非一狐腋。不直五羖皮。我作野史亭。日與諸君期。相從一笑樂。來事無庸知。

歷下亭懷古分韻得南字

東秦富佳境。北渚擅名談。茲游亦已久。纔得了二三。南山壓城頭。十里奎與函。湫流出地底。城隅滿泓潭。金絲弄曉光。玉玦響空嵌。清漣通畫舫。秀水淡雲龕。華峰水中央。鬱鬱堆煙

嵐荷華望不極。綠淨紛紅酣。毒熱非山陽。卑溼無江南。承平
十萬戶。他州隔仙凡。劫火土一正。樹老草不芟。巧盡露天質。
到眼皆奇撥。千里歷下亭。規摹見覃覃。懷賢成獨詠。勝賞何
由參。

舜泉效遠祖道州府君體

重華初側陋。嘗畊歷山田。至今歷下城。有此東西泉。喪亂二
十載。祠宇爲灰煙。兩泉廢不治。漸著瓦礫填。蛙跳聚浮沫。羊
飲留餘羶。我行歷荒基。涕下何漣漣。舜不一井底。下者何有
焉。帝功福萬世。帝澤潤八埏。要與天地竝。寧待一水傳。甘棠
思召伯。自是古所然。我欲操畚鍤。浚水及其源。再令泥濁地。
一變清冷淵。青石壘四周。千祀牢且堅。石渠漱清溜。日聽薰
風絃。優爲泉上叟。杯飲終殘年。

與張仲傑郎中論文

文章出苦心。誰以苦心爲。正有苦心人。舉世幾人知。工文與
工詩。大似國手棊。國手雖漫應。一著存一機。不從著著看。何
異管中窺。文須字字作。亦要字字讀。咀嚙有餘味。百過良未
足。功夫到方圓。言語通眷屬。只許曠與夔。聞絃知雅曲。今人
誦文字。十行誇一日。闕顛失香臭。瞽視紛紅綠。豪釐不相照。
覲面楚與蜀。莫訝荆山前。時間別人哭。

濟南廟中古檜同叔能賦

亭亭祠宮檜。鬱鬱上雲雨。扶持幾年來。造物心獨苦。青餘玉
川潤。根入鐵岸古。雖舍棟梁姿。斤斧安得取。流洑地中久。駭
浪思一鼓。天柱屹不移。水國奠平土。乾坤此神物。甲乙存世
譜。瀨鄉留耳孫。闕里傳鼻祖。秦松徒自汗。蜀柏聊共數。會待

十抱成茲焉重摩拊

銅鞮次邨道中

山逕一何惡。一澗復一嶺。昂頭一握天。放腳百丈井。武鄉有便道。故繞銅鞮境。涉險良獨難。又復觸隆景。羸驂蹄已穴。怨僕氣將癭。與世恒背馳。用力何自省。河汾紹絕業。疑信紛莫整。銘石出壙中。昧者宜少警。少時曾一讀。過眼不再省。南北二十年。夢寐猶耿耿。喻如萬里別。燈火得對影。行役豈不勞。聊當忍俄頃。

蕭齋 并引

故民部長陵蕭公泰和大安之間。名德雅望。朝臣無出其右。其爲太原道漕使時。不肖方廁諸生閒。顧嘗一望眉宇。以爲甚幸。然亦以齒少且賤。不得與橫經之末而爲恨也。

北渡後居陽平。見關中人邢公達。談公平生。往往色揚而神躍。問之。知其爲公夫人之猶子也。蓋公達之先人。於公恩義良厚。而公所以報之者爲甚力。公達初仕部掾。年甫三十。遂爲州上佐。出入臺閣者二十年。雖其材致然。亦藉公爲之司命耳。予雅知公達之敬公也。凡欲聞公之故。則就訪之。公達所居之屋。乞名於予。因以蕭齋目之。且爲之說云。士之生世。有一鄉之士。有天下之士。有一人之所私慕。有天下之所共稱。分限所在。不能以強人。而人亦不得而強之也。惟公承王公餘烈。奕葉台鼎。世譜完具。與當陽杜氏相上下。故言氏族者。推其貴。出入經史。優柔饜飫。發擿祕奧。不減前輩。蔡無可。故言討論者。服其博。奏獻疑獄。致力忠愛。一言之仁。利及永久。故言斷獄者。歸其平。疆禦

不奪其操。公相不易其介。幅巾鄉社。坐鎮頽俗。故言進退者。推其高。蓋天下所共稱。非一人之私慕。高山仰止。其誰曰不然。古人有愛蕭子雲筆札者。得蕭之一字。遂以名所居。況於其所。天平。因為詩以貽。公達有好賢如緇衣者。請為同賦焉。

十年金門客。一日蓬蒿人。煙煤兩椽屋。因公名字新。昔公無恙時。四海望經綸。敦龐一古儒。風采自名臣。人心典刑在。百世留清塵。師尊世共然。況予夙所親。愛公入夢想。透池見壘紳。教兒多讀書。公言諒諄諄。他時門戶改。亦惟公所姻。我嘗望公顏。道左避朱輪。至今誦其詩。喜色為津津。歸秦如未老。會買東家鄰。

別李周卿三首

行路澀於棘。單車望千山。歌君歸雲曲。清涕留餘潏。六年河朔州。動輒得謗訕。惟君篤高義。日來款柴關。古交松柏心。今交桃李顏。古人去不返。古道挽不還。相思一樽酒。幽恨寄山閒。

風雅久不作。日覺元氣死。詩中柱天手。功自斷鼇始。古詩十九首。建安六七子。中間陶與謝。下逮韋柳止。詩人玉為骨。往往墮塵滓。衣冠語俳優。正可作婢使。望君清廟瑟。一洗箏篴耳。

城居日蛙黽。局促復局促。去作山中客。放浪誰檢束。溪光淡於冰。山骨淨如玉。懷我同心人。團茅住溪竹。坐綸鮮可食。種秫酒亦足。石壇三萬丈。醉眼天一粟。安得萬里風。相從兩黃鵠。周卿學有淵源。東州詩人未見其比。與予約西游。如詩中所說。

訓韓德華送歸之作

良朋滿東州。歲月見忠悃。韓侯晚相值。意氣尤懇懇。我嘗相
斯人。趣向識端本。立節柏有心。樹德蘭在畹。官榮睨不顧。寄
興浮雲巘。今世走名場。旗旆幾什偃。賤子本無取。玉趾渠往
返。昨聞遂歸養。見謂竹林阮。暑涂三百里。追送不憚遠。觀君
木訥姿。百念為日損。願方慙衣綱。又被以華袞。桑榆儻可收。
歲事在穰蓂。里門眼中見。歸袖勞重挽。雞黍先有期。升堂未
言晚。渠猶類然

戊戌十月山陽雨夜二首

朔吹作還止。雲意鬱以周。十月雷收聲。陽和自油油。此雨非
舊雨。春旱歷夏秋。道路土三尺。今朝見浮漚。三城信樂土。凶
年未消憂。一蝗食禾盡。半菽不易求。流民四方來。斷港魚鰕

稠忍死待一麥。秋種且未投。乾溢誰所司。雲壇徧九州。醉飽
到狐鬼。巫覡自懷羞。帝命制江湖。野語良悠悠。龍公為汝賀。
桑榆定可收。

霏霏散浮煙。藹藹集微空。出門望白塔。但覺襟袖潤。繁聲忽
赴節。細點復成陣。久渴宜未厭。已作寧小靳。山陽冬候煖。麥
腳易滋分。土膏入滲漉。破粒容可趁。此邦信可樂。風土同一
晉。單車我東來。塵土滿歸鬢。裹糧失先具。閉糴困餘吝。今朝
人事改。一雨開百順。僧窗晚色淨。喜極夢為盡。枕上一詩成。
燈花落紅燼。

看山

慘慘悲去國。鬱鬱賦卜居。不采西山薇。卽當葬江魚。今日忽
有得。蕩如脫囚拘。青山坐終日。忘讀案上書。皋壤與山林。使

我欣然歎我身天地間。託宿真蘧廬。無窮閱有限。萬期亦須
與坎止及流行。何計疾與徐。百年險與夷。又似萬里塗。良馭
馳康莊。九折亦摧車。必惟易之就。遇險當何如。化復生生
體異理。不殊鷺非沐。而白烏豈默而烏。誰續長蹊鶴。誰截短
足鳧。孔墨不煖席。盜跖華堂居。公車困方朔。太倉飽侏儒。杜
子露雙肘。朝參出無驢。軟裘與使馬。照耀輿臺驅。天隨隱笠
澤。杞菊供盤盂。擊鮮日爲具。大嚼皆屠沽。乖逢自乖逢。賦分
無賢愚。作計窮一我。造物良區區。嚮也憂不足。乃今樂有餘。
九日讀書山。用陶詩露淒暄風息。氣清天曠明。爲韻賦

十詩

行帳適南下。居人踟庭戶。城中望青山。一水不易渡。今朝川
涂靜。偶得展衰步。蕩如脫囚拘。廣莫開四顧。半生無根著。筋

力疲世故大似丁令威。歸來歎墟墓。鄉閭喪亂久。觸目異平
素。粉榆雖尚存。歲宴多霜露。

今日復何日。霜氣倏已淒。登高有佳招。山中古招提。翩翩劉
公子。王田重相攜。乾坤動詩興。澗壑忘攀躋。霍侯家甚貧。劣
有酒與雞。城居歇鼙鼓。移家此幽棲。世網不易逃。所向皆塵
泥。何以濯我纓。林間有清溪。

山腰抱佛剎。十里望家園。亦有野人居。層厓映柴門。昔我東
巖君。曾此避塵喧。林泉留杖履。歲月歸琴樽。翁今爲飛仙。過
眼幾寒暄。蒼蒼池上柳。青衫見諸孫。疏燈照茅屋。新月入頽
垣。二句先
人詩依依覽陳迹。惻愴不能言。

霜氣一匳薄。杳杳秋山空。臨高望煙樹。黃落雜青紅。造物故
豪縱。窮秋變春容。錦障三百里。不盡臺山東。粲粲黃金華。羅

生蒿艾叢野人不知貴幽香散秋風秋物自橫陳顧揖苦不
供誰能搖醉筆吐句凌清雄
宇宙有此山閱世過鳥疾何人不此遊名姓寧復識茲辰世
所重前代多盛集柴桑有故事二謝留俊筆併數孟與桓此
外誰記憶人生百年內踏地皆陳迹獨惟我輩人興懷念今
昔山林與皋壤自古長太息
賞心古難并暮景日易費故人成此游尊酒重相慰新詩互
醜唱清談見滋味鱸鮓方偃蹇鼃龜共騰沸懸險劇褒斜清
渾雜涇渭爭教十圍腹滿貯憂與畏情親到真率寧復轉喉
諱鄭重伯雅生藉汝聊吐氣
往年在南都閑閑主文衡九日登吹臺追隨盡名卿酒酣公
賦詩揮灑筆不停蛟龍起庭戶破壁春雷轟堂堂髯御史痛

飲益精明亦有李與王玉樹含秋清我時取後來四座頗爲
傾今朝念存歿壯心徒自驚
我在正大初作吏浙江邊山城官事少日放浙江船菊潭秋
花滿紫稻釀寒泉甘腴入小苦幽光出清妍歸路踏月明醉
袖風翩翩父老遮我留謂我欲登仙一別半山亭回頭餘十
年江山不可越目斷西南天
吾山一何高清涼屹相望龍頭出白塔佛屋壓青嶂雲光見
秋半旭日發毫相峩峩寶樓閣金界儼龍象鄉曲二十年香
火闕瞻向金花香絲草夢想雲雨上福田行欲近重爲詩酒
障終當陟層顛放眼天宇曠
紫薇老仙伯少日見承平甲子五百餘雙瞳益清明披莊不
盈尺翛然澹無營庭柯挂秋蔬老樹風泠泠我有年德尊公

淡鄉曲情思得菊潭酒為公制頽齡作詩語同游明年復尋
盟看翁九節杖翩翩上崢嶸

留月軒

丈室何所有琴一書數冊花竹結四鄰繁陰散芳澤閒門無
車馬明月即佳客三人成邂逅又復得驩伯驩伯屬我歌蟾
兔為動色商聲隱金石桂樹風索索乾坤月與我光滅即生
魄元精貫當中寧有天壤隔卯君尚奚待言論綵數百多談
令人厭坐睡驚墮幘一笑雞未鳴虛窗自生白

梨花海棠二首

梨花如靜女寂寞出春暮春工惜天真玉頰洗風露素月澹
相映蕭然見風度恨無塵外人為續雪香句孤芳忌太潔莫
遣凡卉妒

妍花紅粉妝意態玉媚嫵窈窕春風前霞衣欲輕舉金槩渺
華屋國豔徒自許依依如有意脈脈不得語詩人太冷落愁
絕殘春雨

趙吉甫西園園名種德

王城比民居近市無閑田閑田八九畝乃在城西偏久矣瓦
礫場莽為狐兔阡高人一留顧老木生雲煙築屋臨清流開
窗見西山人境偶相值遂無城市喧趙侯嗜讀書兀坐守遺
編性情入吟咏古淡無妖媚酸鹹與世殊至味久乃全我作
別墅詩請為子孫傳畊耘有定業歉豐屬之天寧作鹵莽兒
袖手待逢年汲古先有齋種德今有園期君在晚歲無庸計
目前

臨汾李氏任運堂二首并序

彥仁從軍久厭於事物之累念欲脫去之而不可得也故
嘗鬱鬱不自聊求予發藥之予名其居曰任運堂且為賦
詩

官職有何好凜凜蹈危機車塵及馬足捧手仍低眉棄去何
足道無從脫繫維不如聽其然歲晚儻可期此心未馴初養
虎時飽飢一為金石止坐閱萬物馳汨泥揚其波哺糟醲其
醪漁父我所學靈均竟奚為上堂壽慈親兄弟如墳簞菽水
致足樂況有甘與肥人生天地間長路有險夷遇險即欲避
安得皆通達君家北山翁百世留清規樂天而知命行矣君
何疑北山翁彥仁之伯祖泰和間以高道提點天
長胥華公贈詩有百世清規之語故及之
履危恨無機避禍欣有策後慮徒自密前路寧汝測七戰歿
牖下坐談得刺客周身容孔智伐木不宋瓦九折怯乘險瘴

海悲遠謫就令家長安獨不死牀簀人生多憂畏年壽幾至
百惴惴首尾閒天宇坐成窄重泉青雲梯平地黃土陌乖逢
有定在拙計徒巧擇行樂當及時莫待頭雪白黃土陌見初
學記奴僕門

題張左丞家范寬秋山橫幅

層崖閔長陰細逕緣絕巘梯雲欄千峻廓廓清眺展斜陽半
天赤飛鳥大江遠清霜張秋氣草樹生意翦風雷斫堅敵旗
旆紛什偃崢嶸峯巒出蒼蒼林薄晚盤盤范家筆老懷寄高
蹇經營入慘澹得處乃蕭散豈止動歸興突兀青在眼何時
臥雲身團茅遂疏嬾

宿張靖田家

地屬壽陽

川涂盡坡陀嶺路入荒梗微茫望煙火向背得廬井殘民安
朴陋倦客喜幽屏兒童聞扣扉租吏有餘警兩厓紛叢薄沙

石立頑獷湍流落空嵌百折不容駟山溪饒風露夜氣淒以
耿園花澹相望邊月空照影淡居苦不早素髮忽垂領誰謂
林野人茲焉惜清景

曲阜紀行十首

荒城臥魯甸寒日澹平蕪千年素王宮突兀此城隅我昔入
小學首讀仲尼居百讀百不曉但有墜成珠少長授魯論稍
與義理俱攝齊念升堂壞壁想藏書翩翩七十子佩服見舒
徐慨然望闕里日思膏吾車五原東北晉因循追桑榆今日
復何日南冠預庭趨隱隱金戶聲恍如夢清都偉哉神明觀
欣幸當何如

殿屋卻火餘瓦礫埋荒基入門拜壇下儼然想光儀憶當講
授初佩服何透迤登降幾何人鸞鳳相追隨千年仰階級天
險不可躋文杏誰此栽世世傳清規植根得所託在木將何
知

堂堂魯三檜培植出天巧規模欲十抱奇秀供百繞誰言甲
戌亂煨燼入炎燎青煙干雲上羣鶴空自矯哀哀嶧陽人腸
肺痛如攪魯郊木何限名取惟一少神明信扶持厄運豈易
曉雩臺滿荒榛遠宮餘曲沼紛紛闕成壞何異宴與早道存
有汗隆物齊無壽夭霜皮眼中見鬱鬱自塵表君看太山戶
萬古青未了

陋巷陋復陋老屋在人境門前軒蓋多閉戶自幽屏近郊無
百畝負郭纔半頃饋粥聊自供取足惟一井此井閱千歲清
節傳箕穎尙想瓢飲初至味久益永德鄰與周旋聖域容造
請貧中有此樂日暮獨何炳泖然窺古磬一勺試甘冷上池

果能神轉盼得淡省。塵埃竟何有。素髮忽垂領。共學誰我容。
從之抱修綬。泮宮何所有。舞雩但荒臺。泮水涸已久。北風捲黃埃。顧瞻魯
公宮。感極令人哀。獻馘亦盛事。規模到平淮。作計萬萬古。而
今安在哉。獨愛鼓瑟翁。不與三子偕。宗周方訖錄。聖師猶卷
懷。但欲春服成。風乎詠歸來。我亦淡蕩人。涉世寡所諧。浴沂
行有日。一笑心顏開。大姦何所如。猘獠雄且猛。雖然弭耳伏。擇肉會一騁。卯也不
敗。露名與聖師。竝天刑。竟莫逃。不待七日頃。曹瞞盜漢璽。僅
得保腰領。與卯均小人。脫網乃差幸。小偷學不至。適足污鐵
鼎。不從市朝肆。必就遠方屏。兩觀餘坡陀。萬世示頑獷。神兵
懷可怖。過者宜少儆。

不見講堂處。指似存世譜。遺基洙泗間。荒惡餘十畝。聖師既
已老。自衛歸在魯。正樂修六經。卒業此其所。當時季路室。完
整逮建武。太僕忠且壯。持用方禦侮。如何唐盛日。一廢不重
舉。中和天地位。寧復俟庭廡。所嗟世道衰。師授日莽鹵。空餘
千歲井。黝黑照終古。

白塔表佛屋。武青鄰。何年勝果寺。西與姬公鄰。塔廟恣
汝爲。豈合魯城闈。魯人惑異教。吾道宜湮淪。許行學神農。耒
耜手自親。當時子孟子。直以爲匪民。況彼桑門家。糞壤待其
身。一朝斷生化。萬國隨荆榛。孟氏非所期。安得楊與荀。丹青
贊神化。舊染爲一新。坐令鍾魚地。再睹籩豆陳。吾謀未及用。
勿謂秦無人。

天地有至文。六籍留聖謨。聖師極善誘。小智祇自愚。文章何

物技不直咳唾餘。操戈競虛名。望塵拜高車。所得不豪髮。咎
責滿八區。公論懸日星。豈直小人儒。喻彼失相者。佞不知所
如。指南一授轡。聖門有修塗。陽光照薄暮。尙堪補東隅。悠哉
發澹省。灑掃今其初。
林墓連魯城。方廣十里閒。林閒百草具。棘刺死不蕃。楷槐作
橫理。青青閱千年。懷人成一慨。何止召公賢。博陵石翁媪。名
字無留鐫。兩獸墓前物。歲久乃譌傳。昨我游魯門。規作孔林
篇。聖人與天大。聖道難爲言。所見不一記。來者何述焉。詩成
私自媿。小子良斐然。

寶巖紀行

陰厓轉清溪。秋老木堅瘦。城居望已遠。步覺脫氛垢。寶巖夙
所愛。丈室方拜叩。曠黑纔入門。徑就石泉漱。遙遙金門寺。寶

焰出巖竇。我豈無盡公。昔見今乃又。同來二三子。寢飯故相
就。況有杜紫微。琴筑終雅奏。瞳瞳上初日。淡樾炯穿漏。逶迤
陟兩巘。萬里若迎候。絕壁三面開。仰看勞引脰。兩山老突兀。
屹立柱。圖覆諸峯出。頭角隨起隨。偃仆不可無。煙霞朝暮爲。
先後橫亘連。巨鼇飛墮集。靈鷲九華與。奇巧五老失。渾厚想
當位置初。遂欲雄宇宙。太行有祺谷。勝絕無出右。大似塵外
人。眉宇見高秀。哀湍下絕壑。電擊龍怒鬪。崩奔翻雪窖。瑩滑
瀉瓊鬚。窮源得懸流。偉觀駭初邁。倦人寶樓閣。白雨散簷溜。
天孫拂機絲。素錦絢清晝。永懷登高賦。意匠困馳驟。窘於游
暴秦。百說不一售。林閒太古石。稍復抔飲舊。已約銘窪尊。細
鑿留篆籀。茲山緣未了。僧夏容宿留。終當勾餘年。奇揆盡雲
岫。

雁門道中書所見

金城留旬浹兀兀醉歌舞出門覽民風慘慘愁肺腑去年夏
秋旱七月黍穉吐一昔營幕來天明但平土調度急星火逋
負迫挫楚網羅方高懸樂國果何所會禾有百騰擇肉非一
虎呼天天不聞感諷復何補單衣者誰子販糶就南府傾身
營一飽豈樂遠服賈盤盤雁門道雪澗深以阻半嶺逢驅車
人牛一何苦

岳祠齋宮夜宿

煌煌德寧宮望秩年祀永唐來幾焚蕩規制仍峻整龍旂嚴
黼座金巖散光炯嶽拜行且周偉觀竊欣幸青紅留壞壁兵
衛自馳騁木杪見龜趺雄筆映鍾鼎中和昔喪亂已溺寧拜
挺有來雁門公赤手揆虎鯁經營入慘澹灑落出鋒穎凶豎

竟自摧神鑒蓋彪炳青山閱人代今古一炊頃摩挲盤根柢
甲子誰記省揭來石門道煙岫接雲嶺霄漢瞻上階濃碧插
秋影青林雨聲集懸瀑激奔猛森然心魄動冰雪淒以耿飄
颯想僊袂飛下玉蓮井昨夢知是非復此造真境妙香淨餘
習灑氣發新警鶴書來何遲素髮迫垂領玄壇展衰步似欲
逐幽屏高柯月紛紛裴回惜清景

示程孫四首

并州望南宮東南千里餘六年念兒女鬱鬱心不舒程孫問
安否一月兩寄書老我倦出門況是涉畏塗鞍馬二十日面
色爲焦枯白兄應見笑此行亦區區

吾女在吾家先以安卑弱雖然適貴門一味甘儉薄財廉出
仁讓語省見端慤婦道化一州母女皆願學州人聞我至相

與喜且愕。謂我六十翁。齒髮未衰落。擊鮮日爲具。和氣動城郭。爲說壻女賢。宅相知有託。乃公私有賀。一月醉杯杓。生女四十年。今有爲父樂。直孫年志學。玉立無纖瑕。簡孫甫勝衣。芳蘭茁其芽。粲粲彩翠翔。鴈雛映朝霞。諸孫獻公壽。喜極復長嗟。吾母河南君。閨門靜無譁。殷勤教女孫。乃今成汝家。老我何足道。外舍儘得誇。會聚樂不貲。言別悽以惻。風雲動老懷。車馬見行色。明年吾六十。家事斷關白。惟當近酒醪。亦復拋書冊。提攜兩童子。款段或下澤。玉雪念吾孫。未覺千里隔。乘興徑一來。髯壻當速客。

九月初霖雨中感寒痺作

留飲工作祟。臂股半風淫。風淫喜陽景。旬浹坐秋霖。兒寒益跳梁。衰暮苦難任。病症怯遙夜。破窗風露浹。兩年魏大名。千門響霜颺。客行足繪纊。家居但疏衾。絢絲不易得。候蟲徒自吟。無衣思南州。傷哉非獨今。

同白兄賦瓶中玉簪

畏景眾芳歇。仙葩此夷猶。冰姿出新沐。娟娟倚清秋。昨夢今見之。風鬟玉搔頭。誰言閨房秀。高情渺林丘。碧筵古銅壺。一室香四周。懷人成獨詠。遠思徒悠悠。

野史亭雨夜感興

私錄關赴告。求野或有取。秋兔一寸毫。盡力不易舉。衰遲私自惜。憂畏當誰語。展轉天未明。幽窗響疏雨。

哭延孫

兒生去年冬閭里日相慶今年迫周晬疹痘俱已竟爛斑綴
錦衫未與玉雪稱宅相望此孫惜愛均氣命一宵誰奪去遽
有亾辜橫情鍾未難忘力挽將安勝憶昔點妝初季女抱臨
鏡灼灼芙蓉花澹與清波映霜風入芳渚瘦綠餘荷柄嬌紅
耿在眼百喚不一應寂寞空鏡前老眼淚如迸

贈鶯

鄰牆擁高樹淡樾蔭衡宇山禽十百種晨夕所棲處獨愛黃
栗留姪姪如穉女笑啼啼又笑宛轉工媚嫵低窺疑欲下轉
盼忽驚擊花暗柳陰陰尚記兒時語詩家此尤物名字喧樂
府天真累絲竹客服仍楚楚宮額畫眉闊黛黑抹金縷恨不
掌上看毛羽得細數山城無與樂好鳥亦求侶時將貫珠來
有唱當和汝

讀書山月夕二首

層厓多古木細路淡莓苔紫門開曉日雲際青山來靜中有
真趣孤賞何悠哉
久旱雨亦好既雨晴亦佳胡牀對明月樹影含清華牆東有
滂池敲枕聽鳴蛙

繼愚軒和党承旨雪詩四首以下續編

南來何所如孤根轉風蓬以彼萬里途寄此一畝宮明窗一
繩牀稍覺紛華空唯餘作詩癖尚與當年同人言詩窮人無
胸詩吾自窮此世等夢耳誰窮復誰通茹噎當快吐聊此寬吾

今古幾詩人擾擾劇毛粟吾愛陶與韋冷然如冰玉大雅久
不作聞韶信忘肉求音扣寂寞一嘆動鄰屋水風清鶴夢月

露洗蟬腹白頭兩遺編吟唱心自足誰爲起九原寒泉薦芳菊
老麻臥雲壑澗松上崢嶸斯文要棟梁頽圯可力撐匠石殊
未來破屋燈青熒乾坤有二鳥一息當一鳴區區用舍閒而
亦隨重輕百挽迹莫前一怒怨已盈臨風三太息此意何時
平
愚軒具詩眼論文貴天然頗怪今時人雕鐫窮歲年君看陶
集中飲酒與歸田此翁豈作詩直寫胸中天天然對雕飾眞
質殊相懸乃知時世妝粉綠徒爭憐枯淡足自樂勿爲虛名
牽

寄英禪師師時住龍門寶應寺

我本寶應僧一念墮儒冠多生經行地樹老井未習一窮縛

兩腦寸步百里難空餘中夜夢浩蕩青林端故人今何如念
子獨輕安孤雲望不及冥鴻杳難攀前時得君詩失喜忘朝
餐想君亦念我登樓望青山山中多詩人杖屨時往還但苦
詩作崇況味同酸寒清涼詩取圓相和尚住清涼往往似方千半年
臥牀席瘧我疥亦頑本草松枝條松脂濟甫詩取苦僧源字
州寸晷不識閒傾身營一飽船上八節灘安行詩取工慕容
山陽人六馬鳴和鸞鬱鬱飢寒憂慘慘日在顏老秦詩取和
秦略字簡夫陵川人平易出淡艱脫身豺虎叢白髮罹惛鰥張侯詩取
豪前登封令張效字景賢雲中人驚風卷狂瀾竅繁天和洩外腴中已乾城
中崔夫子崔遵字懷祖燕人老筆鬱盤盤家無僮石儲氣壓風騷壇
我詩有凡骨欲換無金丹呻吟二十年似欲見一斑大笑擲
揄生已復不相寬愛君梅花篇入手如彈丸愛君山堂句淡

靜如幽蘭詩僧第一代無媿百年閒思君復思君恨不生羽
翰何時溪上石清坐兩蒲團

夢歸

虛庭霜夜寒落葉風自掃况如南窗月坐失西山道長安佳
麗地游子自枯槁人生家居樂學稼苦不早衡門眼中見歸
意滿秋草夜長夢已盡愁絕令人老

郎文炳心遠齋二首

茅齋迫官居塵土日蓬勃道人掩關坐挂眼無外物明窗一
蒲團濯足晨理髮一片萬古心清潭兩明月
止性如止水惜身如惜玉婦姑得相安久矣脫羈束兒童挾
書至燈花催夜讀自是周太常生平耐幽獨

蕭寺僧歸橫軸

山空秋草寒露暗光已夕悠悠松門月靜照禪客入遙知夜
堂淡疏鍾動幽寂

祁陽劉器之以墨竹得名今年春薄游鹿泉因爲子寫

真重以小景見餉凡以求子詩而已賦二十韻答之
去國二十年跬步卽異境中間歷齊晉陡下如墜井轍涸困
波神祠廢臥土梗坐翅附危柯飢腹得畫餅早櫪竝牛驥泥
淖閔蛙黽紛紛疲應接錄錄陪造請尙賴麴生賢真味留雋
永蹉跎鐘鼎意盡付銅尾秉劉生工寫照游戲出俄頃高懸
大圓鏡寓我形神影青衿昨日爾素髮忽垂領詩餘飯山瘦
智縮武庫瘦香漢邈南宮寂寂媿鄧耿包虎錦衾爛辭鶴霜
毛整鼠目與麋頭何堪污毛穎厚貺久未報重以大年景叢
篠點棲禽樹石帶煙暝知君深意在勸我事幽屏衡茅方十

築亦復謀二頃封龍有佳招因之發溪省

荅王輔之

我宅西山隅君居潁之濱昨朝與君語憶我山中春君家縣
豪傑交結通周秦四海盧御史旨來作師賓風流被諸郎文
質猶彬彬乃知父兄意潤屋亦潤身喪亂幾何時孤身走跋
跋貂裘風霜老獨有佳句新被褐懷珠玉知君未全貧我詩
初不工研磨出艱辛雖欲尸祝之芻狗難重陳顧方媿盈川
況敢同照鄰汾流清復清堪君濯纓塵居人與行客早晚期
相親

寄題沁州韓君錫耕讀軒

束帶見督郵甘以辭華軒嘯傲南窗下且樂我所然斜川今
在亾問津有遺編行尋柴桑里遂得桃花源桃源無漢魏況
復義熙前讀書與躬耕兀兀送殘年淵明不可作尙友乃爲
賢田家豈不苦歲功聊可觀讀書有何味有味不得言遙知
一尊酒琴在已亾絃

遺山先生集卷第三

元張德輝頤齋類次 平定後學張穆廉友校梓

七言古詩

虞坂行

丙子夏五月將南渡河道出虞坂有感而作

虞坂盤盤上青石。石上車蹤深一尺。當時騏驥知奈何。千古英雄淚橫臆。龍蟠於泥易所歎。麟非其時聖為泣。玄龜竟墮余且網。老鳳常飢竹花實。天生神物似有意。驗以乖逢知未必。若論美好是不祥。正使不逢何足惜。孫陽騏驥不並世。百萬億中時有一。乃知此物非不逢。轅下一鳴人已識。我行坂路多閱馬。敢謂羣空如冀北。孫陽已矣誰汝知。努力鹽車莫稱屈。

畫馬為邢將軍賦

大宛城下戰骨滿。駑駘入漢龍種藏。將軍此紙何處得。便覺房駟無光。人中馬中兩勍敵。天門雁門皆戰場。并州父老應相望。早晚旌旗上太行。

秋蠶

室人篋中無寸縷。一箔秋蠶課諸女。朝來餉卻上馬桑。隔簇仍聞竹間雨。阿容阿璋墨滿面。畫徹灰城前致語。上無蒼蠅下無鼠。作繭直須如甕許。東家追胥守機杼。有桑有稅吾猶汝。官家恰少一絢絲。未到打門先自舉。

南溪

南溪酒熟清而醇。北溪梅花發興新。前年去年花下醉。今年冷落花應噴。梅花娟娟如靜女。寂寞甘與荒山鄰。詩人愛花山亦好。幽林穹谷生陽春。風鬟戢戢一尺雲。芳香幽臥如相親。

親山堂夜半北風惡。一點相思愁殺人。

送郝講師住崇福官

郝平晉人

大方之家幾知津。郝君七十老斲輪。書文五車喙三尺。劇談混沌今猶神。太玄博士為絕倒。君言夸矣天公嗔。長安冠蓋羅青雲。洛陽車馬爭紅塵。怪君掉頭不肯住。寂寞來作由東鄰。崧高維岳古所秩。三十六帝有外臣。玄都石壇待鸞馭。宮殿突兀松輪囷。上界僊人鄧雲山。洞天治所名司真。蓬萊方丈去不遠。明星玉女時相親。瑤華可擷蘭可紉。煙霞永隔塵中人。黃鵠一去不復返。白鷗萬里誰能馴。為我殷勤謝鄧君。玉華歲晚當平分。

范寬秦川圖

張伯玉歿後同麻徵君知幾賦

亂山如馬爭欲前。細路起伏蛇蜿蜒。秦川之圖范寬筆。來從

米家書畫船。變化開闔天機全。濃澹覆露清而妍。雲興霞蔚
幾千里。著我如在峩嶇巔。西山盤盤天與連。九點盡得齊州
煙。浮雲未清白日晚。矯首四顧心茫然。全秦天地一大物。雷
雨瀕洞龍頭軒。因山分勢合水力。眼底廓廓無齊燕。我知寬
也不辨此。渠寧有筆如修椽。紫髯落落西溪君。長劍倚天冠
切雲。望之見之不可親。元龍未除湖海氣。李白豈是蓬蒿人。
愛君恨不識君早。乃今得子胸中秦。作詩一笑君應聞。子七年前
過郟城伯玉知子來。而都無賓主意。子亦偃蹇而去。爾後雖
願交而髯歿矣。未嘗不以爲恨也。今日子思兄弟出此圖。求
子賦詩。酒惡無聊中。勉爲賦此。畫本米元章家物。有韓子蒼
題名。元章以爲中立。而元暉以爲中正。以子觀之。此特張髯
胸中物耳。知者當不以吾言爲過云。

赤壁圖

馬蹄一蹴荆門空。鼓聲怒與江流東。曹瞞老去不解事。悞認

孫郎作阿琮。孫郎矯矯人中龍。顧盼叱咤生雲風。疾雷破山
出大火。旗幟北捲天爲紅。至今圖畫見赤壁。髣髴燒虜留餘
蹤。令人長憶睂山公。載酒夜俯馮夷宮。事殊興極憂思集。天
澹雲閒今古同。得意江山在眼中。凡今誰是出羣雄。可憐當
日周公瑾。憔悴黃州一禿翁。

寄荅溪南詩老辛愿敬之

五年不喚溪南渡。日夕心馳洛西路。山中今日見君詩。惆悵
良辰又相悞。龍蛇大澤變風景。虎豹天門鬱煙霧。丈夫不合
把鉏犁。青鬢無情忽衰素。平泉漫作窮愁志。笠澤休題自憐
賦。長安正有五侯鯖。骯髒誰能作樓護。青燈老屋深蓬蒿。蝙
蝠掠面莎雞號。劔歌夜半激悲壯。松風萬壑翻雲濤。區區墓
上曹征西。我知慚媿王東臯。人生只有一杯酒。酒螟蛉蜾蠃安

能豪

西園興定庚辰
八月中作

西園老樹搖清秋。畫船載酒芳華遊。登山臨水祛煩憂。物色
無端生暮愁。百年此地旃車發。易水迢迢雁行沒。梁門回望
繡成堆。滿面黃沙哭燕日。瑩瑩一炬殊可憐。膏血再變爲灰
煙。富貴已經春夢後。典刑猶見靖康前。當時三山初奏功。三
山宮闕雲錦重。璧月瓊枝春色裏。畫欄桂樹雨聲中。秋山秋
水今猶昔。漠漠荒煙送斜日。銅人攜出露槃來。人生無情淚
沾臆。麗川亭上看年芳。更爲清歌盡此觴。千古是非同一笑。
不須作賦擬阿房。

愚軒爲趙宜之賦

心生心化誰搏控。舉世佞佞皆大夢。百年只辦作朝三。爭識
羣狙先汝弄。人人具此清淨眼。妄翳無根嗟自種。天機嗜欲
涇渭雜。道念紛華鄒魯鬪。令人卻澹愚軒愚。一蹴藩籬開廓
空。愚軒虛室久生白。掌上精真元自洞。氣筮神火俱長物。豈
有古方傳魯宋。人言此眼本無負。死恨冥行人所共。智愚何
豫阿堵中。或者桔槔賢抱甕。病瘖能指跛能履。肩睫雖存寧
復動。我云俗士蔽一曲。全笑不全從古懼。渠儂六鑿日相攘。
內不錙銖徒外重。守宮緣壁夸覆射。懸蝨如輪規命中。天和
一洩不知止。膏火自焚良可痛。從教目比方相多。纔與瞽師
論。伯仲先生真是有道者。老境一愚聊自送。五官止廢而神
行。就令有眼將無用。寄謝諸方五味禪。葛藤莫作金鑿頰。

雙峯競秀圖爲參政楊侍郎賦

江煙霏霏雲拂石。山木蕭蕭山鬼泣。江岸人家失南北。兩峯

送山先生集卷三
四
突兀何許來。元氣淋漓洗秋碧。畫家晴景費經營。共愛移山入杳冥。安得北風吹雨去。倚天長劍看崢嶸。

西窗

西窗鳥聲千種好。樹影離離動微風。青山滿前掩書坐。欲話懷抱無人同。花枝不笑綠鬢改。尊酒自與黃金空。少年樂事總消歇。落日澹澹天無窮。

二月十五日鶴

九龍岡上玄元祠。人言尊像神所遺。年年二月降靈鶴。來無定數有定期。城頭曉露生新警。萬首望穿雲際影。不知濁世誰下臨。只許霜毛見修整。戶壇花落松風冷。戛然長鳴人語定。百年黧老誇見聞。萬里黃冠赴靈應。只從游騎突重圍。城郭併與人民非。可憐侈殿荒墟裏。無復當年丁令威。

欽聞叔在華下

翰林僊人詩酒豪。平生嵇阮參遊遨。山中草棘滿霜雪。可惜渠家宮錦袍。聞君忍飢讀離騷。思之不見心爲勞。舉頭西望忽大笑。太華落落長庚高。

閩商卿還山中

阿卿去月從我來。今日西山成獨往。野人不是城中物。澗飲巖棲夢餘想。翰林溼新爆竹聲。待詔履穿沾雪行。蘭臺從事更閒冷。文書如山白髮生。孤燈靜照寒窗宿。北風夜半歌黃鵠。田家閉門風雪深。梅花開時酒應熟。半世虛名不療貧。棲遲零落百酸辛。憑君莫向山中說。白石清泉笑殺人。

女几山避兵送李長源歸關中

山骨棱棱雪花白。北風不貸單衣客。與君此別欲何言。若箇

選山先生集 卷三 五
男兒不湮隄。相濡相啣。尚可活。轅釜何曾厭求索。從知絞纏
無隱鱗。芥視三山。需一擘。自古肌腸出奇策。漢廷諸公必動
色。見君軒蓋長安陌。

雪後招鄰舍王贊子襄飲

去年春旱百日強。小麥半熟兩作霜。青山無情不留客。單衣
北風官路長。遺山山人伎倆拙。食貧口眾留他鄉。五車載書
不堪煮。兩都覓官自取忙。無端學術與時背。如瞽失相徒俛
俛。今年得田昆水陽。積年勞苦似欲償。鄰牆有竹山更好。下
田宜秣稻亦良。已開長溝掩烏芋。稍學老圃分紅薑。宋公能
詩雅好客。勸我移家來水旁。一間入手豈易得。夢中我馬猶
玄黃。君不見并州少年作軒昂。雞鳴起舞望八荒。夜如何其
夜未央。賣刀買犢未厭早。腰金騎鶴非所望。河南冬來已三

白土膏墳起如蜂房。崧山東頭玉旆出。父老知是豐年祥。南
溪酒熟梅花香。高聲爲喚牆東王。便當過我取一醉。聽歌長
安金鳳皇。鄰舍宋可字子之。隱君子也。并州少年。謂李
汾長源。長安金鳳皇者。齊梁間田舍兒所歌。

半山亭招中梁飲

孤城鬱鬱山四周。外人乍到如纍囚。半山亭前浙江水。只可
與君消百憂。江山百年有此客。雲樹六月生涼秋。世上紅塵
爭白日。一丘一壑去來休。

鄧州城樓

鄧州城下湍水流。鄧州城隅多古丘。隆中布衣不復見。浮雲
西北空悠悠。長鯨駕海波。立老鶴叫月蒼煙愁。自古江山
感游子。今人誰解賦登樓。

宛丘歎

秦陽陂頭人迹絕。荻花茫茫白於雪。當年萬家河朔來。盡出
 牛頭入租帖。蒼髯長官錯料事。下考大笑陽城拙。至今三老
 背腫青。死為逋懸出膏血。君不見劉君宰葉海內稱。飢摩寒
 拊哀孤。憫碑前千人萬人泣。父老夢見如平生。冰霜紈綺渠
 有策。如我錄錄當何成。荒田滿眼人得耕。詔書已復三年征。
 早晚林間見雞犬。一犁春雨麥青青。髯李令南陽配流民以
 牛頭租迫而逃者餘萬
 家。劉雲卿御史宰葉除逃戶稅三萬斛百姓為之立碑頌德
 賢不肖用心相遠如此李之後十年予為此縣大為逋懸所
 困辛卯七月農司檄予按秦陽陂田感而
 賦詩李與劉皆家宛工故以宛工嘆命篇

游黃華山

黃華水簾天下絕。我初聞之雪溪翁。丹霞翠壁高歡宮。銀河
 下濯青芙蓉。昨朝一游亦偶爾。更覺摹寫難為功。是時氣節
 已三月。山水赤立無春容。湍聲洶洶轉絕壑。雪氣凜凜隨陰

風懸流千丈忽當眼。芥蒂一洗平生胸。雷公怒擊散飛雹。日
 腳倒射垂長虹。驪珠百斛供一瀉。海藏翻倒愁龍公。輕明圓
 轉不相礙。變見融結誰為雄。歸來心魄為動蕩。曉夢月落春
 山空。手中僊人丸節杖。每恨勝景不得窮。攜壺重來巖下宿。
 道人已約山櫻紅。

巨然松吟萬壑圖

胸中刺鯁無九澤。畫裏風煙纔一漚。阿師定有維摩手。斷取
 江山著筆頭。石林蒼蒼厓寺古。銀河浩浩松聲秋。方外賞音
 誰具眼。莫將輕比李營丘。

密公寶章小集

天東長白大寶幢。天河發源導三江。有木蔽映山朝陽。云誰
 巢者雛鳳皇。雲間吐氣日五色。百鳥不敢言文章。名都盤盤

魏大梁黃金里第羅康莊。王家書絕畫亦絕。欲與中祕論低昂。密公書院無絲簧。窗明几潔凝幽香。元光以後門鑰廢。文士稍得連壺觴。客來喜色浮清揚。典衣置酒餘空箱。生平俊氣不易降。眼中俗物都茫茫。淵明素琴嵇阮酒。妙意所寄誰能量。在昔武元握乾綱。扶桑爲弓射八荒。獵取大國如驅羊。取一民風。朴魯資鷲彊。文洽未及武。尅剛興陵之孫。越王子天。以人瑞歸明昌。十三執經侍帝旁。十八健筆陵阿房。撐腸文字五千卷。靈臺架構森鋪張。高陽苗裔襲眾芳。胡不置之貢玉堂。袖中正有活國手。地下纔得修文郎。悲風蕭蕭吹白楊。正山零落可憐傷。承平故態耿猶在。拂拭寶墨生輝光。似如庵連榻坐。一甌春露澹相念。明昌寶玩羣玉中祕內府紫絲鞋歐率更海上楊凝式乞花等帖然獨推元章華佗爲古今絕筆宋畫譜山水以李成爲第一國朝張太師浩然王

內翰子端奉旨品第書畫謂成筆意繁碎有畫史氣象次之荆關范許之下密公識賞超詣亦以此論爲公郭乾暉雀棘公以爲當在太古無上唐以來諸人筆虛筆實皆非其比故予詩及之榜軒公自號也又所居有如庵詩集號如庵小稿越王諸子惟榜軒貧甚典衣沽酒之句蓋實錄云甲午三月二十有一日爲輔之書于聊城至覺寺之寓居

荆棘中杏花

牆東荒溪抱邨斜。荆棘狼藉盤根芽。何年丹杏此留種。小紅濺濺爭春華。野人慣見謾不省。獨有詩客來咨嗟。天真不到鉛粉筆。富豔自是宮闈花。曲池芳逕非宿昔。蒼苔濁酒同天涯。滌京師惜花如惜玉。曉擔賣徹東西家。杏花看紅不看白。十日忙殺遊春車。誰家園亭有此樹。鄭重已著重幃遮。阿嬌新寵貯金屋。明如遠嫁愁清笳。落花縈簾拂牀席。亦有飄泊沾泥沙。天公無心物自物。得意未用相陵誇。黃昏人歸花不語。唯有落月啼棲鴉。

太白獨酌圖

宣和所藏
李伯時筆

謫僊去世三百年。海中鯨魚渺翩翩。豈知龍眠天馬筆。忽有
玉樹秋風前。金鑿歸來身散僊。世事悠悠白髮邊。會稽父老
何處在。千里名山入酒船。清景已隨詩句盡。風流合向畫圖
傳。往時長安酒家眠。焦遂不狂張不顛。想得三更風露下。醉
和江月弄江煙。

松上幽人圖

宋宗婦曹夫人仲婉所
畫。上有曹道冲題詩。

秋風謾謾松樹枝。僊人骨輕雲一絲。不飲不食玉雪姿。竹宮
月夕頻望祠。竟不下視齋房芝。人間女手乃得之。眼中擾擾
昨暮兒。畫圖獨在羲皇時。予懷渺兮幽林思。

送張君美往南中

南朝辭臣北朝客。棲遲零落無顏色。陽平城邊握君手。不似

銅駝洛陽陌。去年春風吹雁迴。今年雁逐秋風來。春風秋風
雁聲裏。行人日暮心悠哉。長江大浪金山下。吳兒舟船疾於
馬。西湖十月賞風煙。想得新詩更瀟灑。

戲題新居二十韻

去冬作舍誰資助。縣侯雅以平原故。賢郎檢視日復日。規制
從頭盡牢固。南風一夕怪事發。突兀赭垣殘半柱。乞漿得酒
過初望。曲突徙薪忘後慮。長淮千里燕巢林。明月一枝烏遶
樹。東家老屋西北走。眾木枝撐留少住。由來馬隊非講肆。況
與甌牢通過路。聚廬託處何暇擇。重為主人推獎悞。夏秋之
交十日陰。抱被倚門愁旦暮。君問新居在何許。只去火餘纔
數步。學宮分地與閒冷。使館有牆遮雜汙。就中此宅尤費手。
官給工材半傭雇。十寒一暴半載強。纔得安牀置鑪釜。紛紛

暗被兒女笑。老虎般彪。今幾度。胸中廣廈千萬間。天地一身無著處。北來衣冠日枯槁。十九桃符傍門戶。乾坤血肉得此身。賸有把茅能勿懼。上方下比良易見。好惡且當隨所遇。仰看片瓦聊自賀。疾過巖牆寧反顧。合歡明日召諸鄰。狼藉盃盤從飽吐。

贈蕭鍊師公弼

吾家阿京愛公弼。吾家澤兄敬公弼。半生夢與公弼游。豈意相逢在今日。春風和氣在眉宇。玉壺冰鑑藏胸臆。人間萬事君自知。未必君材人盡識。蘇門水木無纖埃。聞君家近公和臺。仙家近日多官府。黃帽青鞋歸去來。時汰佛老家甚急故云。

送弋唐佐董彥寬南歸

且為潞府諸公一笑。

河汾續經名自重。附會人嫌迫周孔。史臣補傳久已出。浮議

至今猶洶洶。辭收文志誰所傳。貴甚竹書開汲冢。沁州破後石故在。為甍為瓦吾亦恐。暑涂十日來一觀。面色為顰足為腫。淡公淡癖何所笑。但笑弋卿堅又勇。自言浪走固無益。遠勝閉門親細穴。摩挲石刻喜不勝。念卻崎嶇在岡隴。潞人本淡新有社。淡事重重非一種。有人六月訪琴材。不為留難仍從與。懸知蠟本入渠手。四座色揚神為竦。他時記籍社中人。流外更須增一董。

蕭仲植長史齋

修武作。

張顛飲豪傾四座。脫帽狂呼誰敢和。南宗北宗知幾人。醉眼紛紛飛鳥過。是公技進不名技。元氣淋漓隨咳唾。偶然捉筆本無意。自有龍騫并虎臥。當時誰有戰國策。長史帖云借戰國策可付之凡七門外雷車忽驚墮。天星無數不知名。色正芒寒纔七箇。蕭

郎家世陵谷後爭信空囊蓄奇貨。蕭齋故事今復舉。未怕秋風吹屋破。護持有物世共喜。不獨一時為子賀。藏舟夜壑未厭淡。隄備有人來倚柁。

送宋省參并寄潞府諸人

茅齋團團蝸殼大。苦被傍人嘲塞威。官豪眼孔十萬緡。未與書生供一唾。長衫只辦包瘦骨。故紙何緣變奇貨。不因三致大耳兒。老雪屯門甘凍臥。國中腐鼠凡幾嚇。玉上青蠅非一箇。荆人美璞別之招。君足幸存仍可賀。雲閒太行青在眼。上客歸來傾四座。因君寄問社中人。前日淡公行復過。

覓神霄道士古銅爵

雷章著土紛朱碧。秋菌春蒲人不識。若非儀狄墓中來。應是杜康祠下得。古人偶得酒之傳。摸索飲器流饒涎。巧偷豪奪

吾何敢。他日酬君九府錢。

賦澤人郭唐臣所藏山谷洮石研

研有銘云王將軍為國開臨洮有司歲餽

可會者六百鉅萬其于中國得用者此研材也研作壁水樣

舊聞鸚鵡曾化石。不數鸚鵡能瑩刀。縣官歲費六百萬。纔得此研來臨洮。玄雲膚寸天下徧。壁水直上文星高。辭翰今誰江夏筆。三錢無用試雞毛。

贈休糧張鍊師

金沙霧散風雨疾。一點黃金鑄秋橘。中林宴坐人不知。野鹿銜花蜂課蜜。富兒盤饌羅羶葷。擾擾飛蠅復聚蚊。見說西山好薇蕨。一枝青竹願隨君。

天井關

石磴盤盤積如鐵。牛領成創馬蹄穴。老天與世不相關。玄聖

栖栖此回轍。二十年前走大梁。當時塵土困名場。山頭千尺
枯松樹。又見單車下太行。自笑道塗頭白了。依然直北有羊
腸。

遺山先生集卷之三

遺山先生集卷第四

元張德輝頤齋類次 平定後學張穆誦風校梓

七言古詩

讀書山雪中

前年望歸歸不得。去年中途腳無力。殘生何意有今年。突兀
家山墮眼前。東家西家百壺酒。主人捧觴客長壽。先生醉袖
挽春回。萬落千邨滿花柳。山靈為渠也放顛。世界幻入兜羅
綿。似嫌衣錦太寒乞。別作玉屑妝山川。人言少微照鄉井。準
備黃雲三萬頃。何人辦作陳瑩中。來與先生共炊餅。陳先生
貶官後

題商孟卿家明皇合曲圖

海棠一株春一國。燕燕鶯鶯作寒食。千古萬古開元日。三郎

擗管仰面吹天公大笑噴不得寧王天人玉不如番綽樂句
不可無宮腰不案羽衣譜疾舞底用牧豬奴風聲水聲闕清
都夢中令人羨華胥何時卻竝宮牆聽不恨將身作李暮

過晉陽故城書事

惠遠祠前晉溪水翠葉銀花清見底水上西山如臥屏鬱鬱
蒼蒼三百里中原北門形勢雄想見城闕雲煙中望川亭上
閱今古但有麥浪搖春風君不見繫舟山頭龍角禿白塔一
摧城覆沒薛王出降民不降屋瓦亂飛如箭鏃汾流決入大
夏門府治移著唐明邨只從巨屏失光彩河洛幾度風煙昏
東闕蒼龍西玉虎金雀觚棱上雲雨不論民居與官府僊佛
所廬餘百所鬼役天財千萬古爭教一炬成焦土至今父老
哭向天死恨河南往來苦南人鬼巫好機祥萬夫畚鍤開連

岡官街十字改丁字釘破并州渠亦心幾時卻到承平了重
看官家築晉陽

蟾池

老墓食月飽復吐天公一目頻年瞽下界新增養蟾戶玉斧
誰憐修月苦郡國蟾池知幾所碧玉清流水僊府小蟾徐行
腹如鼓大蟾張頤怒於虎渠家肩閒有黃乳膏梁大丁正須
汝何人敢與月復讎疾過池頭不容語向來屬私今屬官從
今見墓當好看爬沙卽上青雲端

贈荅張教授仲文

秋燈搖搖風拂席夜聞嘆聲無處覓疑作金荃怨曲蘭畹辭
元是寒蟬月中泣世閒刺繡多絕巧石竹殷紅土花碧窮愁
入骨死不銷誰與渠儂洗寒乞東坡胸次丹青國天孫線絲

天女織。倒鳳顛鸞金粟尺。裁斷瓊綃三萬匹。辛郎偷發金錦箱。飛浸海東星斗溼。醉中握手一長嗟。樂府數來今幾家。剩借春風染華髮。筆頭留看五雲花。七言長詩于中獨一句九言韋郎有此例長吉亦有此例

高門關

高門關頭霜樹老。細路千山萬山繞。亂餘邨落不見人。霰雪霏霏暗清曉。莘川百里如掌平。閒田滿眼人得耕。山中樹藝亦不惡。誰遣多田知姓名。許李申楊竟何得。只今唯有石灘聲。許致忠楊湯臣申伯勝李仲常名宦四家隱盧氏時以多田推之亂後俱不知所在矣

甲辰秋洛陽得黃葵子種之南庵明年夏六月作花佛經所謂閻浮檀金明靜柔軟令人愛樂者此花可以當之因為賦長韻余方以病止酒故卒章及之

芳蕤浥露嬌黃濇。五疊湘裙輕襞積。晨妝午醉一日間。白白紅紅總狼籍。上陽宮女要頭冠。摹寫雖工破的難。看來明淨復柔軟。花中乃有閻浮檀。千里移根洛陽陌。主人不飲誰看客。乞與金杯自傾側。明年為渠當舉白。

馬嶺

僊人臺高鶴飛度。錦繡堂傾去無路。人言馬嶺差可行。比似黃榆猶坦步。戶門木落風颼颼。僕夫衣單往南州。皋落東南三百里。鬢毛衰颯兩年秋。予去歲往河南遷奉亦取黃榆嶺路

雲峽并序

君璋啟事西涼。占對稱首其還也。行臺公以宣和寶戶為貺。奇秀溫潤。信天壤間之尤物。君璋因之曰雲峽。邀詞客賦詩。余亦同作。

石盆清冷貯秋水。水面蒼煙飛不起。一堆寒碧几研閒。寶氣
 崢嶸插箕尾。中山雪浪空影像。長安鸚鵡猶紈綺。枉著奇章
 甲乙中。槁項纔堪把耕耒。不知天壤此尤物。鬼刻神剗通有
 幾。薰蒸似欲出泉脈。瑩滑定應凝石髓。剝裂雲華漬月秋。辛
 苦詩僊費摹擬。車箱箭筈連西東。仇池百穴窗玲瓏。飛墮不
 嫌靈鷲小。奇揆已覺太湖空。故都喬木今如此。夢想熙春百
 花裏。膏血綱船枯九州。亡國愁顏為誰洗。主人天質粹以溫。
 天然與山作知聞。退食從容北窗臥。今古起滅真浮雲。
仙人王子可賦石淙有石裂雲華漬月秋之句

雲巖并序

觀州倅武伯英。崞縣人。少日舉進士。有詩名。其賦翦燭刀。
 有啼殘瘦玉蘭心吐。蹴落春紅燕尾香之句。甚為時輩所

稱家故饒財。第宅園亭。為河東之冠。貯書有萬卷樓。嘉花
 珍果。悉自他州移植。為人多伎巧。山水雜畫。斲琴和墨。皆
 極其工。嘗得宣和湖石一。竅竅穿漏。殆若神剗。鬼鑿。炷香
 其下。則煙氣四起。散布槃水上。濃澹霏拂。有江煙疊嶂之
 韻。吾鄉衣冠家。法畫名畫及藏書之多。亦有伯英相上下
 者。伯英獨恃寶石。以擅奇。汾晉間耳。興定末。伯英歿於關
 中。楊戶部叔玉購石得之。壬辰圍城中。以示余。且命作詩。
 危急存亡之際。不暇及也。乙巳冬十一月。來東平。過聖與
 張君之新軒。而此石在焉。聖與名之曰雲巖。余問石所從
 來。聖與言。夏津王帥得之。汴梁泥塗中。而以見貽。余因歎
 一物之微。經歷世變。遷徙南北。乃復為好事者之所寶玩。
 似不偶然。乃為詩道其故。聖與三世相家。以文章名海內。

其才情風調不減前世賀東山晏叔原故卒章以蕭閒明秀峰故事屬之

壺中九華玉孱顏紫煙著水往復還小窗虛明澹相對不數漢宮銅博山會稽禹穴淡無底寶石偷來定山鬼一堆寒碧殊不凡滿谷春雲更堪喜阿欣秀發見眉宇小杜才情淪骨髓摩挲不作几上看繚白紵青便千里渾沌日鑿餘空嵌漏天蒸溼繞風嵐世外元無種香國海內真有補陀巖觀州愛玩頻湔祓民部平生幾薰沐藏舟夜壑未厭淡竟作新軒坐中物一天星月入金尊翠射娉婷自有人只欠宣和鄭先覺為君留寫五湖真

劉遠筆

老斲力能舉玉杵文陣挽強猶百鈞惜哉變化太狡獪嚮也

褐衣今虎文宣城諸葛寂無聞前後兩劉新冊黜謝郎神鋒恨太雋雖然豈不超人羣三錢雞毛吐皇墳尖奴定能張吾軍何時酌我百壺酒為汝醉草丞天雲狡獪變化事見麻姑傳

贈周良老

于公斷獄多平反高門大車在乃孫我居聊城欲二載喜見周叟醇而溫十年大理書上考宜有陽報如于門大兒書來問安否兵饑不死天所存鄭孫毛骨殊秀發寶氣鬱鬱含朝曦機聲嘔啞聒朝昏種瓠五石當酒尊是翁福祿知未艾昆弟和樂連株根白髮阿兄應念我南雲寂寞賦招魂

鴻溝同欽叔賦

劉郎著手乾坤了未害與渠分九州夸兒衣繡自楚楚作計豈復西鴻溝雌雄自決已無策尺寸必爭唯上流韓生已死

言猶在千載令人笑沐猴

雪中自洛陽還嵩山

道人薄有塵外緣。迫入塵埃私自憐。三十六峯一茅屋。夢裏西家掠社錢。津津喜色見眉宇。峩峩青城當眼前。蹇驢徑入風煙去。恰是梅花欲雪天。

祖唐臣愚庵

小智眩篋盜所着。大智移國鬼與讎。浮生匹絹兩孟粥。心計擾擾知何求。青州荊州兔三窟。古人今人貉一丘。喚起羅池柳夫子。與君同醉訾家洲。

過井陘

北山亭亭如驛埃。南山眈眈虎翹首。土門東頭望井陘。漢家風雲自奔走。市人豈識英雄材。金鼓一朝天上來。此山行人

萬萬古。幾不磨滅隨蒿萊。白鹿祠前一杯水。蒼顏聊爲洗塵埃。

北岳

大茂維嶽古帝孫。大樸未散真巧存。乾坤自有靈境在。地位豈合他山尊。中原旌旗白日暗。上階樓觀蒼煙屯。誰能借我兩黃鵠。長袖一拂玄都門。

天涯山

九州上游推大鹵。獨恨山形頗椎魯。天涯一峯今日看。快似昂頭出環堵。何年氣母此融結。鬼鑿神鑿未奇古。八窗玲瓏透朝日。洞穴慘澹藏雷雨。苔花錦石粲可喜。乞與雲煙相媚媼。半空擲下金芙蕖。想得飛來自玄圃。傳聞絕頂更靈異。云是清都羣玉府。五雲飛步吾未能。風袂泠泠已輕舉。東州死

愛華不注。向在陋邦何足數。敬亭不著謝宣城。斷岸何緣此
天姥。酒船何時朝復暮。倒卷滹沱浣塵土。喚起山靈搥石鼓。
漢女湘妃出歌舞。詩狂他日笑遺山。飯顆不妨嘲杜甫。山有
石鼓

智仲可月下彈琴圖

莫春舞雩鼓瑟希。琴語解吐胸中奇。誰言手揮七絃易。大笑
虎頭真絕癡。北風蕭蕭路何永。流波湯湯君自知。三尺絲桐
儘堪老。兒童休訝鶴書遲。

常山妖生四十月。能搦管作字。筆意開廓有成人之量。

喜爲賦詩使洛誦之

大兒小兒舞商羊。東家西家捉迷藏。牙牙作羣雁雁行。是中
乃有常山郎。常山嬌嬌可憐蟲。四歲未有三歲強。黑鷹破殼

自神駿。黃犢放腳須跳梁。只知見紙卽塗抹。誰謂轉腕能低
昂。渠家兩公破天荒。劉輝夢靈果專場。榮鄉亭中詩版在。岐
山名字香山香。此郎晚出西樞房。虎穴虎子不可當。天驚地
怪見落筆。便合抱送中書堂。文星煌煌照燕南。青青子衿滿
恒陽。教官連被鳳尾諾。瑞物多生金粟岡。兒曹變化不作難。
何必二十始乖張。明年作字一丈大。當有稜角垂光芒。回頭
卻看元叔綱。鼻涕過口尺許長。常山白寓齋第三子
叔綱遺山之季子也。

贈利州侯神童

生十四月識字予見時
生二十一月識字無算

牙牙點妝杏蕾紅。阿兄抱之來學宮。今春學語語未正。已能
見書識名姓。隨指隨讀無數重。多生想曾文字中。極知之無
不足。訝更恐洛誦難爲功。土中松粒龍爪脫。萬牛止山起毫
末。君不見黃金寶鼎翡翠青。未要春官許衣鉢。人聞失卻麻

神童明星煌煌出蒼龍。只知江陵圖籍盡一火。誰謂死草生華風。遺山老子未老在。見汝吐焰如長虹。兒字金鼎

奚官牧馬圖息軒畫

曹韓畫樣出中祕。燕市死骨空千金。息軒筆底真龍出。凡馬一空無古今。安閒自與人意熟。瀟灑更覺天機淡。奚官有知應解笑。世無坡僊誰賞音。

紫微劉丈山水為濟川賦

畫家李范真勍敵。方外只今誰第一。自非劉宗祭酒阜昌孫。未信僊翁輕落筆。長洲遠浦各清冷。萬頃風煙一草亭。千章古木散巖谷。鶴髮松姿餘典刑。紙尾不須題姓字。人人知是老人星。

王右丞雪霽捕魚圖

江雲混混陰晴半。沙雪離離點江岸。畫中不信有天機。細向樹林枯處看。魚浦移家媿未能。扁舟蕭散亦何曾。白頭歲月黃塵底。笑殺高人王右丞。

跋酒門限邵和卿醉歸圖邵伯祿之父

邵翁頭白甫三十。高吟大醉無虛日。風流若似靖南湖。每恨聞名不相識。太平邨落自由身。童稚扶攜意更真。醉歸圖上見顏色。喜溢眉宇猶津津。好著蹇驢馱我去。與君同醉杏園春。

題張彥寶陵川西溪圖

松林蕭蕭映靈宇。爍石流金不知暑。太平散人江表來。自訝清涼造僊府。不到西溪四十年。溪光林影想依然。當時膝上王文度。五字詩成眾口傳。忽見畫圖疑是夢。而今塵土浣華

顛本送字今改作浣字陵川在太行之顛蓋天壤間清涼境界也江淮太平散人題詩東廟自已造仙府恨居民不知其樂耳此縣先君子舊治宴游西溪僕以童子侍焉彥寶出此圖求賦詩感今懷昔爲之愴然故篇中有及癸丑十一月三日

汝州倅韓君德華其十祖二世相遼封魯公故名其伯

男子曰魯王父命氏古蓋有之余過其家命魯出拜

謂余言魯名矣而未有字敢以爲請余字之世公德

華曰願終教之乃申之以辭

昌黎諸韓散盧龍魯公相遼開邑封雁行先後六侍中大參高文紀神功龜戶穹窿與天終百年故家餘素風汝州有子今成童攷古制名龜筮從貴以道義飭汝躬良璞不治凡石同貞而絕俗孰子容濟質以文介而通願雖宗起其起宗魯也不慚袁氏公

王子冬至新軒張兄聖與求爲兒子阿平制名余名之

曰琥以仲耽字之小字明復有善禱之義焉詩不工

當令阿耽灑落誦之

阿平玉雪絕可憐皎如鶴雛下青田呼來拜客挽不前啼聲如聞過秦篇陳王人門漢韋賢新軒文筆尤翩翩大昭掛壁誰使然我知一經會有傳玄默之冬客須城問平之年纔五齡迺公爲兒求制名兒名從虎玉與并仲耽爲字以字行佛書舊說無空青豈知空青今有形紫公紫公還我明看兒著脚青雲平

世宗御書田不伐望月婆羅門引先得楚字韻

瑤光樓前按歌舞桂樹秋香月三五白頭誰解記開元四海歡聲沸簫鼓兩都秋色皆喬木三月阿房已焦土天上亦有

遺山先生集 卷四 九
別離情。可是田郎心獨苦。承平舊物霓裳譜。寶氣暉暉映千古。銀橋望極竟不歸。滅沒燕鴻下平楚。

送崔夢臣北上

子真抱關買臣負薪。朝秦暮召名動縉紳。此有志之士所以自奮於昌辰者邪。夢臣崔卿玉樹清姿。士門華胄。成童授學。與雞俱興。肆筆成書。倚馬可待。雖泌水之洋洋。堪樂舜門之穆穆。方開惜歲月之虛捐。欲雲霄之坐致。遇順風而蹤大壑。其孰禦之。登金馬而上玉堂。在此行矣。詩以勸駕。序寧闕乎。癸丑二月望日新興元某序。

并州書郎年少客。細馬金鞭日三百。生平意氣陵青雲。未怕天山雪花白。西園此日盛徐陳。鳳閣鸞臺氣象新。由來草創資潤色。況復天造須經綸。他日南歸吾未老。與君同醉晉溪春。

春

送王彥華

中朝名勝龍山冀。喜色門闌得佳壻。一朝天府效驅馳。萬里青雲在平地。金粟岡頭俊造多。莫從人品問如何。迂齋受學青衿日。殷重遺山爲拊摩。東國人倫吾豈敢。只憑月旦泐巍科。

李成之王彥華趙孝先以提學命見餉佳酒且求制名

輒以詩記之

子雲寂寞將誰親。延之麤豪意自真。君家公壻兩冰玉。酒味自合清而醇。雲腴俗士無風神。紅珠女兒茜裙新。一杯香絕韻亦絕。只今惟有酴醾春。

劉時舉節制雲南

雲南山高去天尺。漢家弦聲雷破壁。九州之外更九州。海色
激清映南極。幽并豪俠憲功名。咄嗟顧盼風雲生。今年肘後
印如斗。過眼已覺烏鬢平。諭蜀相如今老矣。不妨銅柱有新
名。

贈張潤之

許年不唱龍津第。人物尤難到衰世。明堂他日要榱桷。造物
也須論蚤計。晉人稟賦例真淳。兒能讀書知養親。遺山門客
富儒雅。綠髮張郎名姓新。莫道琴工有師法。海山淡絕解移
人。潤之資甚美。故就其可致者而勉之。他
日學業有成。老夫當以風鑒自負矣。

許道寧寒溪古木圖

道人醉袖蟠蛟龍。掃出古木牙須雄。開卷飄飄來陰風。翟卿
論畫凡馬空。能知畫與詩同宗。解衣盤礴非眾工。遺山筆頭

有關全意匠。已在風雲中。留待他日不忽忽。

送張書記子益從嚴相北上 并序

子益省郎觀國之光。從公于邁。楊雄詞賦。良借力於吹噓。
鄧禹功名。本無心於祿仕。詩以送別。亦以趣其歸云。
故家人物。饒奇俊。聳壑昂霄。今已信。康侯晝接拜。寵光百里。
自應沾海潤。六月貂裘。風雪淡。天河天駟日駸駸。莫把聲華
動臺閣。東方書檄。要陳琳。

贈別孫德謙

津橋垂楊雪花白。挽斷春衫苦留客。西湖一雨春意濃。絕似
銅駝洛陽陌。湖亭轟醉臥春風。到手金杯不放空。鵲山一帶
傷心碧。羨殺孫郎馬首東。

汾亭古意圖

堯民義皇去未遠。日作日息天機全。杜侯袖裏姑汾筆。辦與南華談。宥然廢興知。經幾今昔淳。樸別有一山川。白雲亭上秋風客。不比僊翁甲子年。元祐以來郭熙明昌泰和間張公佐皆年過八十而以山水擅名今雲中杜丈莘老與張郭年相若而畫品不下古人爲侯廣道作汾亭古意橫披灑然有塵外意爲題四韻其後神仙張果生帝堯甲子年詩家亦傳習用之故末句有及

太原贈張彥遠

并州城邊十月末。清霜稜稜風入骨。因君夜話吳江春。酒光激盪金杯滑。閑閑騎跡去滅沒。當年愛君俊於鶻。平生我亦識翁人。惆悵流年如電抹。官家新築文昌臺。蒼生不憂墮顛。匡眼看東閣。奇士滿如君。豈得藏蒿萊。晨雞未鳴子當發明。星煌煌大於月。野夫一笑冠纓絕。

換得雲臺帖喜而賦詩

周官武臣奉朝請。劍佩束縛非天真。世間曾有華陀帖。神物已化延平津。米狂雄筆照萬古。北宗草書纔九人。今日雲臺見遺墨。黃金牢鎖玉麒麟。

鹿泉新居二十四韻

土門西邊井陘渡。野日荒荒下汀樹。榆關戶嶺都幾程。客夢往往迷歸路。塵埃風雨半生過。儘著筋骸支世故。寧州假館又兩年。未保東來不西去。山城百家家有山。覲面呈山誰一顧。賣書買得呂氏園。不謂全山舉相付。北厓老作土灰色。擁腫形模一夸父。娟娟正有小娥媚。卻立不容親杖履。就中抱犢尤峭拔。望見韓山卽攀附。韓王砦頭四望闊。全趙米如纔數聚。眼中麾蓋天上來。泚水鼓旗紛偃仆。漢家威靈萬萬古。斥子連岡猶虎踞。夏秋眾壑會鹿泉。浩浩湍聲瀉餘怒。西南

諸峯不知數。蕩海鯤鱸尻背露。霏煙空翠有無中。百態陰晴
 變朝暮。靈巖龍泉曾一到。獨欠封龍展衰步。學僊不愛徐童
 花李相書龕。心所慕。生平懷抱向山盡。老氣崔嵬如有助。巖
 居枯寂朝市喧。喧寂兩閒差有趣。得行固願留不惡。流坎且
 當隨所遇。何曾萬錢何用許。方丈有山容下筓。管城初無食
 肉相。黃帽非供折腰具。明年高築野史亭。天已安排看山處。
 多慙不及謝宣城。標出敬亭天一柱。一本尙慙不及謝宣城
 標出敬亭天一柱在方

過劉子中新居

鄆州城隅兩茅屋。市聲喧喧自幽獨。春風吹盡山杏花。只有
 青青一叢竹。先生愛畫如惜玉。練鵲翔鸞餘百軸。大兒跟鏘
 挾書歸。土銼疏煙纔一粥。微官枉負半生閒。也著區區簿領

問何時卻與溪南老。紫蓋山前共往還。子中舊與溪南詩老
 辛敬之游故有下句

東湖次及之韻 以下續編

西山山頭山月白。倒影漣漪舞寒碧。竹溪花島要君詩。醉墨
 幾番枯研滴。東湖佳處詩已盡。矯首不知川路隔。當年韓賈
 文章。伯物色分留到佳客。此州何必減蘇州。頻有詩人來列
 職。一時人境偶相值。萬古風流餘此席。三堂風月今猶昔。擬
 拂塵纓問投跡。因君寄謝使君公。卻恐他年厭求索。

贈郝萬戶

阿卿袖中五色筆。弦聲裂戶雷威壁。繡衣千騎東方來。俊氣
 崢嶸蜀山碧。詩書義府無古今。祭遵軍中亦歌吟。密侯勳業
 君自識。計算不數韓淮陰。莫看仁柔行儒雅。朱輪畫轂見大
 心。鄧禹封高密侯。

王學士熊岳圖

洗滌池水甜於蜜。玉堂仙翁髮如漆。膝前文度更風流。盡卷
風流入詩筆。長松手種欲摩天。海岳樓空落照邊。古來說有
遼東鶴。仙語星星誰爲傳。五百年間異人出。卻將錦繡裹山
川。

贈史子桓尋親之行

七十老親頭雪白。滿意晨昏慰顏色。兵塵溷洞君不憂。萬里
天心不相隔。八月秋霖九月霜。破帽北風官路長。瓜田故侯
貧且病。愛莫助之徒自傷。後日書來聞吉語。通家猶得似南
陽。

遺山先生集卷第四

